



Nau yu ken Teksim Wari, Tingting, Painim Pren, Kanage stori o Pas bilong yu i kam long Digicel namba **7235 6149** na bai mipela putim long Pes 2...

Kalsa i win tru...



KUNDU NA DIGASO FESTIVAL: Ol Kutubu pipel long Sauten Hailans i amamas moa long soim pasin tumbuna bilong ol na ol i wari long planti ol dispela pasin i wok long lus. Osem na ol i kirapim dispela festival bilong soim pasin bilong ples. Hia ol man i singsing danis wantaim ol sotpela kundu (sa'o duibu o sa'o gauwage) bilong ol Foi long raunwara Kutubu. *Poto: Don Niles Moa stori long Pes 5.*

Oposisen kotim gavman

■ Long bikpela milien i lus long rot kontrak ■ Long salensim 63.4 pesen PNGSDP mani

Stanley Nondol i raitim

Oposisen i tokaut ol bai salensim O'Neill gavman long kot long tekova long PNG Sastenabel Di-velopmen Program (PNGSDP) na Ok Tedi Mining Limited (OTML) na bai tok paik strong long planti

bikpela disisen em gavman i mekim long sotpela taim. Oposisen i tok ol dispela disisen i no stret na em i laik ol pipel bilong kantri i mas save long as tru bilong ol dispela disisen bilong gavman.

Ol bikpela disisen bilong gavman

we Oposisen i salensim em, tekova bilong OTML na PNGSDP, K800 milien supahaiwe long Lae-Nazab na K399 milien Togoba-Kiseneopi rot na K800 milien bilong 2015Pasi-fik Gems na ol rot kontrak bilong NCD na ol arapela.

Oposisen lida, Belden Namah

long dispela wik i tok em bai sapa-tim ol CMCA papagraun bilong Westen provins na kisim O'Neill gavman go long kot long givim 63.4 pesen dividen mani bilong OTML go bek long papagraun bihain long gavman sensim lo na kisim 100 pesen. **I go moa long pes 2**

INSAIT Polis ripot - PNGSDP i mekim wok bilong gavman - P2

Nupela haus silip bilong ol nes Is Nu Briten gat tupela gavana- P7

Ol Pipel bilong Raikos i kisim fama na bisnis trening -P21

Ritim Wantok Komentri long pes 13

WINIM LASPELA KIT HAUS LONG OKTOBA

Harip na top ap nau, na yu ken kamap lucky winner blo displa Kit Haus. Moa top ap you mekim, moa entries bai yu kisim.

WIN
1 of 4 KIT HOMES WORTH K100,000

WIN
32" LCD TV EVERY WEEK

WIN
A SAMSUNG GALAXY S4 EVERYDAY

WIN
A SHARE OF K500,000 WORTH OF TOP UP DAILY

Samsung GALAXY S4
3G+ DIGICELPNG.COM
Digicel

Painim CASH MONI bilong yu insait long KEN

"Painim CASH MONI insait long GLOBE na SITA Corned Beef or Mackerel ken"

Na kamap Wanpela LAKI WINA NAU!

Sapos yu painim displa ol CASH Moni:

K1,000

K500

K100

K50

K10

"Aninit insait long ken" Go kisim CASH MONI bilong yu long Globe dealer or kelim Globe Hotline 422 3066

Tupela kinas long PNG

HARIAP!!!
Baim ol GLOBE na SITA ken mit or MACKEREL ken bilong yu NAU

Promosen bai pinis long 31st December 2013

PNGSDP i mekim wok bilong gavman



Polis Ripot

G4S Sekyuriti stilim K6milien Kina

NCD: Ol polis long Mosb i wok long painim ol stilman bilong wanpela sekyuriti kampani husat i stilim K6.3milien bilong Maybenk na ranawe long Fraide moning. Plis ripot i tok ol dispela stilman bilong G4S i bin giaman long karim mani bilong Maybenk i go long putim long Bank ov PNG long Fraide moning, tasol long taim ol i kamap namel long siti, wanpela bilong ol i kamautim pistol na hensapim draiva na ol arapela wanwok bilong em. Em i fosim ka i go long olupela Haus ov Asembly rot we tupela arapela ka i wetim ol. Ol stilman i rausim ol nainpela bokis mani na putim long tupela ka na ol i ranawe. Long taim ol polis i kamap, ol stilman i go pinis. Ol polis long NCD i tok dispela stilpasin em ol wokman bilong sekyuriti kampani yet i mekim. Ol polis i wok long mekim wok painimaut yet.

Stilman holim kalabus famili bilong Korea

ALOTAU: Ol polis long Milen Be i wok long mekim wok painimaut long ol stilman husat i holim wanpela famili bilong Korea na stilim mani. Ripot i kam long Alotau i tok ol stilman i brukim haus bilong famili na kalabusim Kim Sew-yi wantaim meri na pikinini na bebi sita bilong ol. Ol stilman i kisim ol i go long stua bilong Kim na tokim em long givim mani long ol. Long taim ol stilman i kisim ol samting i stap ol polis i kamap na ol stilman i hait baksait long ol famili na kalap long wanpela dingi na ranawe i go long solwara. Ol stilman i lusim famili bilong Kim long wanpela ailan long Misima na ol i kisim Kim i go na lusim em long nrapela liklik ailan, Paneati. Ol pipel bilong ples i kisim em i go bek long Misima. Ol polis long Alotau i tok klostu bai ol i arestim sampela bilong ol dispela stilman.

Stilman hensapim PMV long Wewak

WEWAK: Ol polis long Wewak i kisim ripot bilong ol stilman i hensapim wanpela PMV bilong ples Woginara long wes kos klostu long Mangara na stilim ol mani na arapela samting long ol pasindia. Polis ripot i tok PMV i ran i go long Wewak na taim ol i kamap klostu long taun, draiva i stop long kisim mani long ol pasindia. Ol stilman i hensapim ol na tokim draiva long go stop long olupela timba rot na ol i stilim mani na ol arapela samting. Ol yut bilong dispela eria i wok long helpim ol polis nau long painim ol dispela stilman.

Kot kalabusim studen inap nainpela mun

LAE: Kot long Lae i salim wanpela studen i go kalabus bihain long ol polis i painim drag insait long bilum bilong em. Dispela yangpela man, Samuel Arnold bilong Nabak long Morobe probins i askim kot long sotim taim i kam daun long tripela mun. Tasol mejistret i tok nogat bikos planti studen i wok long mekim bikhet pasin. Mejistret i tokim Arnold long no ken tingting long mariwana long taim em i kam aut long kalabus bikos mariwana i mekim ol gutpela lain i kamap hap sens.

Stilman i wet kot

NCD: Wanpela stilman em ol polis i sasim long stil pasin na kamapim bagarap long bodi bilong man i kamap long Waigani komital kot long dispela wik na bai em i kamap gen long kot long Novemba 7. Polis ripot i tok Hillary Weni bilong ples Tauwete long Wes Sepik na tripela arapela man i bin kamapim dispela trabel long Jekson ples balus Mosbi, long 26 Me. Ol i sasim Weni long 8-pela sas bilong stil na wanpela sas bilong kamapim bagarap long bodi bilong narapela man. Ol polis i tok weni na lain bilong em i kamapim bagarap long 31 pipel. Weni i bin baim beil long K1,500 na i kam aut na wetim kot bilong em long mun Novemba.



Teksim Wari, Tingting, Painim Pren, Wantok o Pas bilong yu i kam nau.. Digicel namba: 7235 6149

Dia Wantok Niuspepa, mi wanpela Boi save stap wantaim mama bilong mi. Papa bilong mi em dai pinis. Em tasol mi salim teks i kam long dispela.

Wanpela Boi – 04/10/2013

Mi laik bringim komplek bilong mi i go long Shornclif kampani olsem rot mentenens wok ol i mekim i no 'professional' wok. Ol i save wokim i stap wanpela wik tasol na Morobe gavman i no luk-save long wok na givim nating mani stap. Painim gutpela Kontrakta.

Simap Mihi – 04/10/2013

Dia Wantok Niuspepa, PNG i wok long go long han na het nogut wantaim. Olsem na Bougainville bai bruk na lusim PNG.

-03/10/2013

Dia Wantok Niuspepa, ol Jiwaka pipel em i pinis long kot keis. Planti haia kar yusim long famili wok, tupela i go – i kam long Mosbi tumas na ol i no sindaun gut long opis na wok wantaim ol pipel bilong Jiwaka. Bikpela mani bilong ol Jiwaka pipel, ol dispela famili tasol i kaikai na pinis. Ol Jiwaka pipel yupela pasim maus na ai i stap a? Olsem wanem na yupela i no inap toktok na wanpela yia i go nating?

Kuma Maldam – Minj, 07/10/2013

Dia Wantok Nius, mi Mal na kris-mas bilong mi em 30. Mi singel man na mi laik painim wanpela meri long PNG long maritim na stap wantaim oltaim. Husat i gat laik plis yu ken ringim mi long 7232 0277. Tenkyu Wantok.

Mal – 07/10/2013

Dia Edita, mi laik sapotim brata Vincent. Mi man Raikos /Nahurawa LLG. James Gau i no ken wansait, plis tingim mipela tu. Raicoast i no Bugati tasol, tingting gut!

Yune Taninkeo, Pom – 06/10/2013

Dia Edita, mipela laikim stori moa long "Death Penalty" long Wantok Niuspepa olgeta taim.

Sumatin, Mendi



SIAMAN bilong PNGSDP Ltd, Sir Mekere Morauta, i tok long Mande 7 Oktoba olsem Prais Minista i mas tokaut long kantri na ol pipel bilong Westen Provins, wanem samting i kamap long ol mani nesanel gavman i kisim long Ok Tedi main.

Stat long 2002 i go long pinis bilong 2012, Nesanel Gavman i bin kisim K11.2 bilien long main, bihain long ol i rausim ol narapela kos, na K6.9 bilien ol takis na ol arapela sas na K4.3 bilien long winmani. Trupela piksa em olsem, Gavman bilong O'Neill i bin kisim K2 bilien long O'Neil na Ogas 2012.

"Tasol i no gat kaikai bilong ol dispela mani insait long Westen Provins," Sir Mekere i tok.

"Long 2002 i go long 2012, PNGSDP i bin kisim K5 bilien long ol winmani. Long dispela

mani, em i bin yusim K650 milien insait long Westen Provins, K537 milien insait long nesnen, na em i sevim \$US1.4 bilien bilong lukautim bilong provins bihain long main bai i pas. Mipela i ken kauntim olgeta mani bilong mipela," Sir Mekere i tok moa.

"Mipela i askim nau, olgeta mani bilong Nesanel Gavman i go we? Ol pipel bilong Westen Provins i laik save long dispela," Sir Mekere i tok.

"Mi laik salensim Prais Minista long kampaim wanpela indipenden pablik inkwairi long mekim wok painimaut, long wanem kain we ol i yusim mani insait long provins. Inkwairi i mas gat pawa long singautim ol pablik sevan na ol politisen long bekim tok, na pawa long givim tok orait long kotim ol lain i mekim rong.

Sir Mekere i tok dispela inkwairi i mas painimaut sam-

pela bikpela toktok olsem:

- Bilong wanem na Daru Haus sik i bagarap tru?
 - Bilong wanem na PNGSDP i mas kam insait na mekim wok bilong gavman long long stretim na mekim Daru wara na toilet sistem i go bikpela?
 - Bilong wanem na PNGSDP i mas mekim wok bilong Gavman long stretim Daru Trestle Wof?
 - Bilong wanem na PNGSDP i mas mekim wok bilong Gavman na mekim Daru ples balus i go bikpela?
- "Wokim na stretim ol infrastraksa bilong Gavman em i no wok bilong PNGSDP," Sir Mekere i tok.
- "Em ol wok bilong Gavman. Prais Minista, yu mas save olsem PNGSDP i laik helpim gavman. No ken putim hevi bilong yu long mipela," em i tok.

Oposisen kotim gavman

I kam long pes 1

Mista Namah i tok gavman i mekim bikpela asua long i no toktok wantaim papagraun long wanem as gavman bai tekova na rot em bai menesim 63.4 pesen bilong ol.

Mista Namah i tok gavman i gat 100 pesen pawa long mekim disisen bilong 63.4 pesen bilong ol pipel.

Oposisen lida i tok O'Neill gavman i mekim baset long defisit o dinau na em i tok long gavman i ken salim 63.4 pesen long ol ausait kampani na mekim mani long fandim ol projek we i no stap long baset na ol arapela komitmen bilong gavman.

Oposisen i tok Prais Minista Peter O'Neill i yusim namba pawa long senisim bikpela mama lo na em gat bikpela pawa long mekim disisen we ol arapela memba bai tok yes tasol.

Oposien namba i pundaun kam daun long 6-pela memba tasol na gavman i gat moa long 100.

Deputi Oposisen lida, Sam Bsil i tok bilong wanem na gavman i givim K399 milien kontrak long China Machinery Engineering Construction long mekim 20 kilomita rot long Kaugel bris go long Kisenopi rot



Oposisen: Belden Namah, Sam Basil, Tobias Kulung

bung. Mista Basil i tok gavman i no mekim gutpela disisen long pablik mani na bikpela milien kina lus long pasin korapsen long nem bilong rot.

Em i tok planti rot long distrik i bagarap na ol ples manmeri kisim taim long kam long taun na haiwe long salim kaikai na bisnis.

Bikpela tok pait i kamap namel long planti insait long kantri taim Prais Minista Peter O'Neill i tokaut olsem wok painim bai kamap long rot kontrak bilong Lae-Nazab rot na Togoba Kisenopi rot long moa long K1 bilien bihain long memba bilong Kundiawa Tobias Kulung i tokaut olsem i gat bikpela asua stap long kos bilong givim kontrak.

Mista Kulung i tokaut long palamen na long pablik olsem K800 milien supahaiwe long Lae-Nazab na K399 milien Togoba-Kiseneopi rot em

gavman givim moa long K1bilien long Saina kampani bai mekim sotpela rot.

Mista Basil i tok bilong wanem na gavman i givim planti bikpela milien kontrak long Saina kampani na askim praim minista long tok klia long pablik sapos gavman i yusim K6bilien kina dinau bilong Exim Benk bilong Saina.

Oposisen dispela taim i tok gavman i yusim namba pawa na mekim bikpela disisen bilong kantri long bikpela bilien we no gat gutpela kaikai na sevisi bai go long ol ples lain.

Mista Basil na Mista Kulung i tok bilong wanem na Mista O'Neill i tok bai gat wok painim i kamap long tupela rot long K1bilien taim praim minista em yet save pinis long wanem rot dispela mani go bikos em i siaman bilong NEC we givim tok orait na tokaut long dispela bikpela kontrak

Mista Kulung i tok gavman i mas tok klia long pablik bilong wanem na kampani bilong Saina, Chinese Railway Engineering Construction i kisim moa long K800 milien kontrak long bildim infrastraksa bilong 2915 Pasifik Gems taim dispela kampani i no aplai long kisim wok na i no gat nem long tenda bot.

Mista Kulung i tok ol memba bilong palamen i no ken stap maus pas na tok yes tasol long disisen bilong praim minista.

Em i tok ol memba i makim ol pipel na i mas tokaut long wanem samting i no kamap long gutpela bilong kantri.

Mista Kulung na Sam Basil i tok ol memba long gavman sait i votim bikpela senis long konstitusen na kalabusim ol yet na bai i no isi long senisim praim minista sapos praim minista i no mekim gutpela disisen bilong kantri.

Ol ausait lain i sindaun pinis long graun bilong Luteran misin



Sampela lain wokim haus na gaden tu long soim olsem ol kisim graun pinis.

PLANTI pipel long Madang i wok long paul na askim planti kwesten taim ol i lukim planti ol nupela pamanen haus kapa na tu ol manmeri i klinim eria long graun we Luteran misin (ELC-PNG) i papa long en namel long Nagada na Baitabag rot long not kos bilong Madang provins.

Dispela graun em pastaim Luteran misin i gat bikpela kokonas na kakao plante-sen long en. Tasol bihain no gat wok i

kamap long en i stap na i no long taim i go pinis, ol pipel bilong kain kain provins long PNG i go baim ol blok na wokim haus na stap.

Wanpela komyuniti lida bilong Alexishafen, husat i no laik kolim nem bilong em i askim ol lain hetman na dairekta bilong bisnis bilong Evanjelikol Luteran Sios (ELC-PNG), Kambang Holdings long mekim wanpela wok painimaut i go long dispela graun we nau planti kain kain lain bilong ausait long Madang i wok wokim haus na tu kirapim bisnis long hap.

"Mi guria stret olsem sampela ol lain bilong Hailens i go wokim bikpela haus na bringim ol masin i go insait putim na wokim olsem em ples bilong ol stret,

"Pastaim mi save olsem dispela graun stat long Kapundik wara i go olsem long Baitabag em ol misin i save lukautim, tasol olsem wanem tru nau na ol ausait lain i kapsait long hap na wokim haus, planim flaua, banisim na wokim bisnis na kain kain ol samting long hap," lida ya i tok.

Em i tok long las wik antap Gavana bilong Madang, Jim Kas i bin yusim buldosa long rausim sampela ol lain long graun bilong Madang provin-sal gavman arere long RD Tuna fektori. Tasol em i no muv i go olsem long Nagada.

Lida ya i tok siaman bilong Kambang Holdings na olupela Sif Jastis na Rijinol memba bilong Madang, Sir

Arnold Amet i mas lukluk long dispela bikpela samting na painimaut.

Em i tok nau yet planti kain kain lain bilong arapela ples i wok long go insait long Madang na kain kain hevi tu i wok long kamap. Long las mun tasol ol i painim bodi bilong wanpela man bilong

"Mi guria stret olsem sampela ol lain bilong Hailens i go wokim bikpela haus na bringim ol masin i go insait putim na wokim olsem em ples bilong ol stret."

Sepik arere long rot long Nagada we ol lain i baim graun na sindaun long en.

Em i laikim Sir Arnold na bod bilong Kambang Holdings na ELC-PNG hetman i mas

sindaun na glasim wanem rot tru na ol lain bilong ausait i go baim blok long graun bilong misin na sindaun long en namel long Nagada na Baitabag. Ol i mas sekim gut sapos em kastomari graun bilong ples-lain o em graun bilong Luteran misin.

Sampela stori i raun long Madang olsem wanpela famili long Nobonob i tok olsem em graun bilong ol na i wok long brukim i go olsem blok na salim i go long ol ausait lain. Ol i tok graun ya em Luteran misin i kisim long ol bipo yet na i no baim ol tumbuna bilong ol na tu taim we ol i givim long misin long yusim graun insait long 99-yia lis em i pinis na graun i go bek long ol papagraun.

"Sir Arnold Amet i mas mekim wok painimaut i go insait long dispela ol ripot na sekim gut sapos em tru o nogat," lida ya i tok.

Dispela hevi bilong ol lokal pipel bilong Madang i salim graun i go long ol ausait lain em bikpela tru. Sampela lain blong ausait i wok long go long Mosbi na kisim taitel long graun na go long Madang na kisim graun, we sampela i no bihainim stret-pela rot.

I no long taim i go pinis Gavana bilong Madang, Jim Kas i stopim wok long kamap long pablik bas stop namel long Madang taun bihain long wanpela bisnisman bilong Lae, husat em bilong Enga provins i laik kirapim wanpela bisnis long hap.

grow business
Banking solution for SMEs

Smart Business Package

- ✓ Smart Business Current Account
- ✓ Smart Business Deposit Account
- ✓ Smart Business Debit Card
- ✓ Mobile and Internet Banking

Plus Smart Business Loan

320 1212 / 7030 1212 - 24/7
servicebsp@bsp.com.pg
www.bsp.com.pg | f t



Official Sponsor of the 2015 Pacific Games

LUKLUK BEK LONG WIK:**GAVMAN BAI BAIM BIKPELA MANI:**

LONG dispela wik, yumi lukim ol ripot we Gavman o Stet i kisim oda long baim planti milien kina long i no mekim gut wok bilong en, ol asua we sampela opisa long ol lo ejensi olsem polis i mekim long kamapim birua long ol manmeri na ol arapela kain asua olsem.

Wanpela em abitresen i wokim disisen long las wik Fonde na givim oda long Stet i baim K295 milien olsem hap komitmen bilong em long developim Solwara 1 Dip Si Maining Projek long Nu Ailan Provins. Stet i no bin baim dispela mani i go log developa bilong Solwara 1 Maining, Nautilus Maining kampani bilong Kanada .

Long narapela kot, Humen Raits Jas, David Cannings i bin tokim Stet long baim moa long K31,000 i go long tupela man em ol polis i bin wokim nogut long ol na i bin kamapim bagarap long tupela. Ol polis i no gat pepa long holim tupela.

Long ol ripot, Oxy Kaima na Zaris Ken em tupela man we wanpela polis skwat memba i bin go insait long haus bilong ol long Kanage Strit na paitim ol. Dispela i kamapim bagarap long bodi bilong ol. Na ol polis i no bin sasim ol tasol i bin kisim ol i go long polis stesin na Bomana Haus kalabus na holim ol long sampela de. Dispela pasin i egensim humen rait bilong ol we kot i lukluk long en na wokim disisen na odaim Stet na polis opis i go pas long dispela asua long baim moa long K31,000 i go long dispel tupela man.

Parkop kisim moa sapat long stopim buai ...Siti i kamap klin nau

Bihain long tambu long salim na kaikaim buai long pablik ples long Okoba 1, Mosbi siti i luk nais na klin. Planti lain i lukim dispela na ol i sapatim Gavana Powes Parkop. Gavana i go het na kamapim dispela tambu, maski planti lain i bin egensim em. Planti bilong ol em ol lain i save salim buai. Mista Parkop i tok em i laik helpim ol lain i salim buai long lukautim ol yet na ol famili, na em I laik lukim Mosbi siti tu i mas stap kiln long ol yia i kam. Em i tok em i no laik stopim pipel long salim o kaikai buai, tasol ol i mas wokim samting stret na no ken tromoim pipia bilong buai na spet nabaut long wanem, dispela pasin i ken kamapim ol kain sik na mekim siti i luk deti na nogut. Mista Parkop i tok em bai strong long lukim olsem dispela lo bilong stopim long salim na kaikai buai long siti i ran gut.

Long wankain taim, Gavana bilong Nu Ailan, Sir Julius Chan i sapatim samting Mista Parkop i mekim. Sir Julius i laik kantri i mas bihainim dispel lo bikos em bai mekim ol pipel mekim samting stret long pasin bilong lukautim pipia bilong ol na mekim ples i stap helti na klin. Em i tok em bai go het long provins bilong em long mekim wankain pasin we Gavana Parkop i mekim long Mosbi.

Wok painimaut long bikpela mani long ol rot projek

BAI gat wok painim long bikpela mani gavman i baim ol kontraka husat i wokim ol rot long kantri, Praisin Minista Peter O'Neill i tok. Dispela toktok bilong praisin minista i bihainim ol toktok em Oposisen memba, Tobias Kuleng i bin mekim las wik. Mista Kuleng i askim watpo na bikpela mani tumas i abrusim 1 bilien kina gavman i givim kontrak long tupela kampani bilong Saina long tupela rot projek long Morobe na long Hailens.

Mista O'Neill i tokim Sif Seketeri, Sir Manasupe Zurenuoc, long makim wanpela independen tim i mekim wok painim long kos bilong ol dispela rot projek we i winim bilien kina. Wanpela em long K800 milien supa haiwe long Lae i go long Nadzab long Morobe Provins, na rot long Togoba i go olsem long Kisenepoi long Hailens i kos K399 milien. Awod long karimaut wok long tupela rot em tupela kampani bilong Saina i winim na ol bin sainim kontrak long las wik.

PNG Air Sevis program bai go het

NESENEL Eksekutiv Kaunsil (NEC) i tok orait long moa mani bai i go long PNG Air Sevis modenaisesen program.

Long Tunde dispela wik, Kabinet i tok orait long putim US\$75.3 milien bilong PNG Air Sevis Limited i mekim wok bilong Modenaisesen Program.

Ekting Praisin Minista Leo Dion i tok, sampela moa mani bai i go long mekim dispela

wok. Kos bilong Modenaisesen Program em US\$95.3 milien.

Mista Dion i tok, Airlain indastri i laikim PNGASL long kamapim gutpela moa sevis, wankain olsem ol intenesenel stendet bilong daunim kos bilong operesen.

"Sapos yumi gat wanpela ful atometik air trafik menesmen sevis wantaim setelait, em bai givim gutpela sevis tru long ol namba wan kastoma bilong

em," em i tok.

Olgeta masin bilong wok wantaim ples bilong wok i olpela na i no gutpela moa long yusim long kamapim ol nupela sistem bihainim intenesenel stendet, olsem na NEC i tok orait long dispela mani bai i helpim tru long senisim.

"Modenaisesen Program bai kamapim ol gutpela samting olsem ol infrastraksa bilong PNG airway i kamap gut, PNGASL i ken wok long wankain

mak wantaim ol arapela sistem long wol. Em bai kamapim moa sefti na gutpela wok wantaim ol narapela lain i save givim wankain sevis. Kain wok poroman bai daunim kos bilong sevis bilong airlain na PNGASL," em i tok.

Ekting Praisin Minista i tok, bikpela samting em ol ples balus i stap insait long ruel na bus ples long PNG i ken kisim helpim long sait bilong sefti long karim ol pipel i go i kam.

Geoscience Program Enuel Konprens 2014

NESENEL Eksekutiv Kaunsil (NEC) i givim tok orait long wanpela K2 milien projek bilong Geoscience Program Enuel Konprens long kamap long 2014.

NEC i tok orait long Dipatmen bilong Treseri na Nesenel Plening na Monitoring long yusim K2 milien long holim

namba 50 Kodineting Komiti bilong Geoscience Program (CCOP) Enuel Konprens long 2014.

CCOP bai kamap insait long kantri long 19 i go 26 Oktoba, 2014. Ekting Praisin Minista, Leo Dion i tok, NEC i tok orait long holim dispela bikpela bung bilong rijen.

Em i tok, Kabinet i tok orait tu long namba 63 Stering Komiti Miting long 24 i go 26 Oktoba, 2014 long PNG.

Dispela em bai namba tu taim long PNG i go pas long wanpela kain bung olsem. Namba wan bung I bin kamap long Madang long 1986.

"Nau bai ol I holim long Is

Nu Briten Provins long wanem, i gat ol maunten paia insait long rijen bilong ol na em i gutpela ples long kain kibung olsem i kamap," Mista Dion i tok.

PNG em i wanpela bilong ol 13 memba kantri bilong CCOP insait long Is Esia na Saut Is Esia.

CASA Enuel Ripot na Korpret Plen

NEC i tok orait long CASA Enuel Ripot na Korpret plen na 3 yia Korpret Plen bilong Papua Niugini Sivel Eviesen Sefti Atoritii long go long palamen.

Ekting Praisin Minista, Leo Dion i tok, NEC i tok orait long CASA 2012 Enuel Ripot na tu

long tok orait long Korpret Plen bilong 2012-2015 long i go long palamen.

Mista Dion i tok CASA i bin kamap aninit long Sivel Eviesen Ekt 2000 na em independen steturori atoriti i bosim wok bilong ol sivel

eviesen sistem insait long kantri.

"Wok bilong CASA i bilong holim na strongim sefti na sekyuriti bilong sivel eviesen, long stopim birua i no ken kamap insait long sivel eviesen sistem bilong PNG," em i tok.

JK McCathy Museum lonsim Soso Subi galeri

Sape Metta i raitim

BIHAIN long planti gutpela wok em ekting dairekta Martha Togiewa na ol opisas bilong em i stretim gut ol samting long JK McCathy Museum, ol i opim wanpela

seksen insait long museum na putim nem Soso Subi Galeri long nem bilong papa bilong gavana bilong lsten Hailans, Julie Soso.

Gavana Soso husat stap long taim ol i opim Soso Subi Galeri i tok, em i amamas tru long

luksave em museum i givim long papa bilong em.

Em i tok, papa Soso em wanpela lidaman long Gahuku na tu, em i save i gat tingting long holim strong pasin kalsa na tredisen o pasin tum-buna. Na long luksave

na givim nem bilong papa long galeri, em i bikpela samting.

Misis Soso i tok provinsel gavman i givim K20,000 long wan wan yia, na dispela mani bai kam long baset bilong provinsal gavman.



Bihain long ol i opim Soso Subi Galeri – gavana bilong lsten Hailans Julie Soso K20,000 i go long Dairekta bilong Nesenel Museum na At Galeri Dr. Andrew Moutu em i ekting dairekta bilong JK McCathy Museum Martha Togiewa.

Poto: Sape Metta

Komyunikesen sekta ministeriel stetmen

NEC tok orait long ministerial stetmen bilog komyunikesen sekta long i go long palamen.

Ekting Praisin Minista, Leo Dion i tok dispela ministerial stetmen i tok kliia long ol bikpela wok bilong Dipatmen bilong Komyunikesen na Infomesen (DCI), Nesenel Infomesen na Komyunikesen Teknoloji Atoritii (NICTA), na Nesenel Brodkasting Kopresen (NBC).

"Minista bilong Komyunikesen na infomesen i gat wok bilong em olsem minista wantaim tu ol wok bilong DCI, NICTA na NBC na long Ogas 2011, gavman i putim Telikom (PNG) Limited i go aninit long em." Mista Dion i tok.

Rausim bisnis nems ekt 1963

Long Tunde 8 Oktoba, NEC i tok orait long rausim Bisnis Nems Ekt 1963, na mekim nupela senis long Kampani Ekt 1997.

Ekting Praisin Minista Leo Dion i tok dispela senis bai mekim isi long ol liklik bisnis lain long save gut long ol senis i stap insait long Kampani Ekt 1997, na bringim i kam wan lain wantaim ol senis i save kamap long korpret gavanens.

"Kabinet i givim toksave long Namba wan Lejislesen Kaunsil long raitim draf long ol senis, bihainim ol lo bilong raitim lejislesa," em i tok.

"Ol nupela senis bilong Kampani Ekt 1997 nau bai i stap long internet long ol liklik bisnis i ken lukim na pulimapim," Mista Dion i tok.

Ekting Praisin Minista i tok, dispela ekt i no bin senis long taim ol i bin tok orait long em long palamen long 1997. Em i sanap antap long Nu Silan Kampani Ekt 1993. Nau ol dispela senis tu bai bihainim mak bilong ol senis i kamap long Nu Silan Kampani Ekt bilong 1997.

Kundu na Digaso Festival i kamap long Kutubu

Don Niles i raitim

LONG 20 i go inap 21 Septemba, ol lain Kutubu i wokim namba tri Kundu na Digaso Festival bilong ol. Dispela festival i no kamap long taun, em i kamap long ples Daga, klostu long Pimaga stesin long hap bilong ol Foi, em tokples bilong ol manmeri Kutubu yet.

Long dispela tupela de, samting olsem 17 grup i kam singsing. Planti em ol lain Foi yet, sampela i stap klostu long raunwara Kutubu, na sampela i longwe liklik. Ol meri Samberigi i kam singsing tu, na tu sampela grup long ples Fogomaiyu bilong Bosavi i bin kam. Dispela lain em ol i save tokples Kasua. Na wanpela grup i kam long Kikori long Galp provins yet.

Sampela ol dispela manmeri i kam long ka, sampela i wokabaut. Olgeta i laik kam amamas long pasin tumbuna wantaim ol Foi.

Em i namba tri taim bilong dispela festival i kamap. Ol lain Kutubu i amamas moa long pasin tumbuna bilong ol na ol i wari long planti ol dispela pasin i wok long lus. Olsem na ol i kirapim dispela festival bilong soim pasin bilong ples.

Ol i kisim sapot long Community Development Initiative (CDI), Mineral Resources Development Company (MRDC), World Wide Fund for Nature (WWF), Trans Wonderworld (TWL), Oil Search (OSL), National Gaming Control Board (NGCB), na wan wan arapela ol lain. Dispela festival tu i save kamap long kalenda bilong National Cultural Commission. Het tok bilong dispela festival em "Bus bilong yumi, kalsa bilong yumi."

Ol Foi i gat tupela kundu. Sotpela kundu em sa'o duibu o sa'o gauwage. Ol man bai bilas long retpela pen na paitim. Longpela kundu em sa'o fare. Ol man i paitim dispela kundu i putim blakpela pen long skin bilong ol. Pasin bilong paitim kundu em long helpim ol sikman.

Digaso em tokples Foi long wel ol man i save kisim long diwai. Long taim bilong tumbuna, planti lain bilong Hailans i save yusim dispela



Kundu na Digaso Festival i kamap long ai bilong wanpela longpela hausman bilong ol Daga. Foto Don Niles

wel long bilasim skin bilong ol. Olsem na ol Foi save kisim dispela wel long diwai na karim long longpela mambu. Ol lain long Wola o Kewa i save mangalim tru dispela wel na ol i save baim long ol Foi long ol sel kina na pik.

Festival i soim ol dispela pasin bilong singsing, bilong kundu, na bilong digaso. Na tu ol meri Foi i soim pasin bilong ol long singsing sori

taim man o meri indai. Ol meri tu i soim pasin bilong paitim susap. Ol meri i save moa long pasin bilong wokim basket na ol i soim dispela tu long festival.

Olgeta manmeri i kamap long Kundu na Digaso Festival i amamas tru long lukim pasin bilong ol Foi, Bosavi, Samberigi, na Kikori. Planti pasin bilong ples i strong yet long ol. Neks yia

dispela festival bai kamap gen na planti lain moa bai gat sans long amamas wantaim ol long pasin bilong ples na ol gutpela samting long bus.

Dr. Don Niles i wok long Institut bilong Papua Niugini Stadis na em i lukautim Musik Dipatmen

Praim Minista i no ken paulim pipel

OLPELA Praim Minista, Sir Mekere Morauta, i tok singaut bilong Praim Minista Peter O'Neill long sekim tupela bikpela rot projek, em i wanpela giaman tok tasol long paulim ol pipel.

Sir Mekere i mekim dispela toktok bihain long wanpela singaut bilong Praim Minista long Oktoba 4, long em i laik sekim prais bilong wokim supa haiwe bilong Lae-Nadzab (K800 milen) na Togoba-Kisenepoi rot (K399 milen).

"Ol dispela kontrak em nau tasol i kamap. Olsem na Praim Minista i gat olgeta tok-save bilong ol pinis. Ol kontrak i save go long Dipatmen bilong Woks, Sentral Saplai na Tendas Bod na tu bai i go long Nesenel Eksekutiv Kaunsil," Sir Mekere i tok.

"Olsem na sapos i gat sampela samting i no stret long prais bilong ol dispela kontrak, Praim Minista em i

save pinis. Em yet i siaman bilong NEC na i bos bilong tok orait long olgeta kontrak olsem," em i tok.

"Planti toktok i kamap long K1 bilien rot projek bilong NCD, NEC i bin tok orait long ol, i no long taim i go pinis, long stretim Hubert Murray Haiwe, namel long NBC na 6-Mail, Pasifik Gems Viles kontrak, na Sir Donald Cleland pul kontrak," Mista Morauta i tok.

"Ol pipel i no laik harim PM i tok 'em i mekim wok painim aut' taim em i save pinis long stori. Ol i laik harim olsem em i givim oda long kisim narapela lain olsem Frod Skwad na Ombudsman Komisen long mekim wok painimaut," Sir Mekere i tok.

"Ol pipel i save wanem samting i wok long kamap, na ol i laikim eksen. Em i no ken hait aninit long ol switpela toktok na giaman bilong em i stap." Sir Mekere i tok.

Stretim Watut Bris hariap

WOK i mas kamap hariap long stretim gen seksen bilong Watut Wara bris we i bruk taim bikpela haiwe trak wantaim hevi masin i ron long en.

Sapos ren na tait wara i kamap bikpela hevi moa i kamap long dispela ekkes rot we Ramu NiCo i mekim em nau ol pablik trak na PMV i wok long yusim i stap.

Waput bris i stap long Madang-Ramu Haiwe. Ol i bin wokim dispela bris long 1970s na krismas bilong en i klostu 40 yia. Na strong bilong en tu i no inap long holim ol bikpela weit na kago.

Dispela birua i bin kamap taim bikpela trak bilong Mapai Trensport we i wok aninit join-vensa wantaim KBK Limited i bin karim wanpela bikpela masin fran-loda i go olsem long Kurumbukari nikel main.

Ol pipel long Waput tok taim trak ya i ron olsem long Ramu i go olsem long Usino mausrot na taim em i go antap long bris wantaim hevi lod long baksait bris em i krungutim i pundaun i go daun na o ain blong bris tu i krungut nabaut.

Taim bris i pundaun, pablik trenspot i kisim hat taim stret bikos nogat pablik rot moa,



Hevi long masin brukim bris pundaun long Waput.

na ol i yusim liklik rot i go insait long eria bilong ol lain papagraun.

Kros i kamap taim ol papagraun i sasim K50 long wan wan trak i go long rot bilong ol, tasol wanpela gutpela strongpela man husat i save wok wantaim trenspot seksen bilong Ramu NiCo Menesmen (MCC) long KBK Main, Lee Issac i stap na

daunim kros na putim was long ol dispela masin i brukim bris.

Mista Issac i wok olsem Trensport supavaisa long KBK Main wantaim sampela opisa bilong Komyuniti Afes Dipatmen bilong Ramu NiCo i bin givim taim bilong ol long stap was long ol masin samting long dispela taim bilong hevi.

Usino-Bundi distrik Woks menesa, Steven Biko i tok olsem wok i mas kamap hariap long wokim gen seksen bilong bris we i bruk bikos ren i ken pundaun enitaim na sapos wara i tait en i ken givim bikpela hevi gen long dispela ekkes rot we Ramu NiCo i mekim em nau ol pablik trak na PMV i wok long yusim i stap.

Nupela haus slip bilong ol nes

SEPTEMBER 27, Sen Mary Haus Sik long Is Nu Briten i opim nupela 40 bet haus slip bilong ol nes meri.

Dispela wok bai pulim planti gutpela nes i gat save bai i kam insait long haus na bai helpim tru long daunim taim bilong ol sik lain i save wet long lukim nes na kisim marasin long aut pesen. Bilong wanem, ol nes i no gat ples bilong slip na namba bilong ol i sot insait long haus sik, olsem na namba bilong ol sik lain i save winim namba

bilong nes.

PNG Insentiv Fan bilong Austalia gavman i bin helpim Sen Mary Haus sik long kamapim dispela projek. Hetman bilong Australia Aid long PNG, Stuart Schaefer i tok, dispela projek bai bringim gutpela lukaut bilong helt bilong ol mama i gat bel wantaim ol bebi na ol pikinini.

"Bai i gat moa nes long was long ol mama taim ol i karim, olsem bai ol i ken stopim sampela dai long mama na bebi," Mista Schaefer i tok.

"Gutpela ples bilong wok bai i ken pulim ol meri long wok long helt na helpim ol nes meri long kisim moa save long wok insait long klinik," em i tok.

Gavman bilong Australia i bin putim K2.2 milien na Sen Mary Haus sik i putim K510,000 long pinisim dispela projek. Nupela haus slip i gat haus kuk, ples bilong kaikai, waswas na stadi tebol long wan wan rum.

Operesenal Opisa bilong Sen Mary Haus Sik, Phil Dolby i tok dis-

pela haus slip bai helpim haus sik long wokim gen rosta bilong haus sik na ol liklik klinik long rurel ples.

"Gutpela ples bilong slip na stap bai helpim ol nes long stadi moa na kisim save long wok bilong ol," em i tok.

"Insentiv Fan i putim K130 milien bilong wokim 20 bikpela projek bilong edukesen na helt insait long PNG, bihainim ol bikpela plen bilong PNG gavman," Mista Schaefer i tok.

"PNG wanbel na i tok orait long

ol bikpela plen bilong Australia aid, em long stretim edukesen, helt na HIV/AIDS, lo na jastis na transpot infrastraksa. Mipela wantaim i sainim ol wok bung pepa long wok wantaim long kamapim ol plen bilong mipela." em i tok.

Helpim bilong Australia long sait bilong helt long PNG i wok long bringim moa gutpela marasin saplai i kam long ol pipel na kamapim moa helt woka wantaim gutpela save, na bringim gutpela helt sevis i go moa.

Is Nu Briten gat tupela gavana

Michael Novingu i raitim

Presiden bilong Is Pomio LLG na Siaman bilong woks na infrakstraksa, Herman Yareng i nupela namba tu gavana bilong Is Niu Briten provinsal asembli. Ol i makim em i kamap nupela namba tu gavana bilong Is Niu Briten Provins long kibung bilong asembli long dispela wik.

Siaman bilong provinsal asembli na memba bilong Kokopo na Gavana bilong Is Nu Briten, Ereman To Baining Junia i tok tenkyu long ol asembli memba long makim Herman Yareng olsem namba tu bilong em long wok wantaim em long kisim sevis i go long pipel bilong Is Niu Briten.

Gavana To Baining i tok bai provins i lukim gutpela wok bung bai stap namel long pipel bilong Pomio, Baining, Tolai na ol wok lain bilong provinsal edministresen long wok wantaim trupela na stretpla pasin long kisim sevis i go long ol manmeri bilong provins.

Ol i makim tu ol maus man na meri long provinsal eksekutiv kaunsil long makim maus bilong ol meri

em, Annastacia Zao, mausman bilong sios em, Reveren Darius Gami, ol NGO na praivet kampani em Douglas Pidi na yut na spots em Philip Tale.

To Baining i tok tenkyu long ol dispela lain maus manmeri i stap long provinsal eksekutiv kaunsil long las tem ol i bin mekim gut wok bilong ol long kisim sevis i go long pipel bilong Is Nu Briten. Mausmeri bilong ol meri Alice Pawa, mausman bilong ol sios Reveren Amos Niba, mau meri bilong ol NGO na praivet kampani Elizabeth Tonge na yut na spots Cleopas Warpit.

Long wankain taim, nupela namba tu gavana, Herman Yareng i tok tenkyu long ol provinsal memba long makim em i kamap namba tu gavana bilong provins. Em i singau long 5-pla memba bilong Is Nu Briten long palamen long wok bung wantaim, lus ting ting long kros namel long ol yet na helpim long kirapim gutpela sindaun bilong ol pipel bilong provins.

Yareng i tok dispela wok i no isi long mekim. Em i tok em bai traim long kisim sevis i go long pipel bilong em long Pomio na Is Nu Briten wan-

taim long kirapim gutpela sindaun bilong ol long ol komyuniti bilong ol.

Em itok tenkyu long ol pipel bilong em long Is Pomio long makim em long kamap LLG presiden bilong ol I lukim em I kamap namba tu gavana bilong provins.

Long wankain taim namba tu praim minista na rijinol memba bilong ENB, Leo Dion i tok tenkyu long Herman Yareng long kisim dispela wok olsem namba tu gavana bilong provins. Em i tok dispela wok em i bikpela wok na Herman i mas wok gut long trupela na stretpela pasin long kisim sevis i go long manmeri bilong Is Nu Briten.

Emi singaut igo long ol pipel, lidamanmeri long provins long wokbung wantaim Herman Yareng long wok bilong em long bringim sevis i go long ol manmeri long provins.

Memba bilong Pomio Paul Tiensten tu i tok tenkyu long ol makim wanpela pikinini bilong ol Pomio long holim wok olsem deputi gavana bilong ENB.

Tiensten i tok i no gat rot i go long Pomio olsem na planti manmeri I lusim laip bilong

ol long yusim ol bot long kam wok bisnis long Kokopo.

Em i askim deputi gavana long wok wantaim gavana bilong ENB long wokim rot hariap long Kokopo i go long Pomio bai helpim ol pipel long Pomio distrik. Em i tok Pomio i gat planti wok olsem wel pam ol i planim pinis na nidim rot long kisim ol welpam kam na salim.

Tiensten i tok gavman I mas traim painim rot long tanim oil bilong wel pam long Is Niu Briten bai kirapim moa wok long pipel bilong provins na no ken salim i go long arapela kantri.



SOIM TUMBUNA PASIN: Kundu na Digaso Festival i bin kamap long Leik Kutubua eria we 17 grup i kamap long soim pasin kalsa, danis na singsing. Wanpela grup i kam long Kikori long Galp provins yet. *Poto: Don Niles*

AGRICULTURE TRACTORS

- Slashers
- Disc Ploughs
- Disc Harrows
- Post Hole Augers
- And Other Attachments for Farming

AGMARK MACHINERY

PORT MORESBY: 323 7957 | Digicel: 7215 0333 / 7217 9815
LAE: 472 6324 KOKOPO: 982 8748 | email: machinery@agmark.com.pg

Long stretim bisnis wari bilong yu, Advatais wantaim

Wantok
Niuspepa Bilong Yumi ol PNG stret!!



Ringim: **Axie**



Augustine



Lydia

Bai ol i stretim wari bilong yu!

Fon: 325 25 00 Fax: 325 2579 Email: advertising@wantok.com.pg

Ol lus lain bilong 2012 Madang Open kempen long bai ileksen

SAMPELA ol lain kenidet husat i bin resis long Madang Open Ilek-sen long las yia na i bin lus long resis nau i wok long givim sapot bilong ol i go long ol kenidet i resis long bai ileksen.

Wanpela long ol bikpela pes kenidet husat i resis long 2012 Madang Open Ilek-sen em Morris Ban, husat em olpela LLG presiden bilong Trans-Gogol. Nau yet dispela man i givim sapot bilong em i go long foma MP Nixon Philip Duban na i draivim wanpela lenkrusa kar we i gat posta bilong Nixon na raun kempen.

Ol arapela LLG kaunsila na ol lain husat i sanap long las yia i givim sapot na tingting bilong ol tu long ol lain husat i resis long bai-ileksen.

Madang taun nau i lukim planti kar i gat kain kain ol piksa blong ol kenidet bilong bai ileksen i pulap

Antap long ol diwai tu i gat ol bikpela bena bilong ol kenidet i stap

taim kempen i go het yet.

I gat 18 kendidet i resis long bai ileksen bilong Madang Open, bi-hain long Kot Bilong Dispiuted Riten i painim asua long win bilong Mista Duban. Kenidet husat i kamap namba tu long las yia ilek-sen na man husat i salensim win bilong Duban em Bryan Kramer. Nau tu em i resis long dispela bai ileksen.

Wantok Niuspepa i glasim olsem nau yet planti ol dispela kenidet bilong Madang bai ileksen i no kempen strong tumas long Madang taun, bikos namba bilong ol man husat i resis long taun eria i planti na vot bai bruk bruk nabaut. Dispela i mekim ol kenidet i mov i go aut long rurel ples long distrik long givim tok gris bilong ol long ol pipel long kempen bilong ol.

Insait long Madang taun yet em planti ol PMV bas long rot i karim ol

piksa na posta bilong ol kenidet.

Sampela ol PMV trak na bas bilong rurel eria tu i mekim wankain pasin.

Ol lain kenidet bilong arapela provins tasol i stap longpela taim long Madang i traim strong long yusim ol pipel long ol eben setelmen long kisim sapot.

Wanpela long-taim residen bilong Madang, Peter Posanau bilong Manus provins i tok olsem dispela bai-ileksen em bai strong tru bikos sampela lain bai pilai mani na givim kain kain samting long winim bel bilong ol pipel long votim ol.

Tasol bikpela samting em manmeri i mas tingting gut na vot long gutpela lida husat i bilip long tok-tru na wok ples-klia na i ken bringim sevis i go long ol pipel.

Em i tok nau yet ol kenidet i gat ol kempen haus i sanap long planti kona bilong taun, setelmen na ol viles long Madang distrik.



Ol sapotas bilong Yama.

Papua Niugini i ken kamapim planti muvi ekta

STRONG bilong planti Papua Niugini manmeri long kamap ekta long ol muvis i kamap ples klia las wik long taim wanpela piksa muvi ol kolim Mr. Pip bin kamap nam-bawan taim long kantri.

Paradise Cinemaslong Mosbi i bin soim dispela piksa na tu ol i bringim PNG yangpela Bougainville meri, Xzannjah Matsi, husat ek olsem Matilda, na narapela tupela yangpela man, Calextus Simeon na Tidman Ikosi husat i ek olsem ol PNG soldia.

Dispela piksa Mr. Pip i stori long ol samting i bin kamap long taim bilong Bogenvil kraisis.

Ol narapela muvi we planti Papua Niugini i ekta na tu ol i bin wokim long insait long kantri em Tukana na Man Friday bilong Robinson Crusoe. Narapela piksa ol i kisim long Indonesia tasol i gat ol PNG ekta em Jungle Child em ekta Calextus Simeon i bin wanpela ekta tu long en.

Planti bilong ol ekta long dispela muvi Mr. Pip em ol Papua Niugini manmeri na pikinini.

Matilda em i bin wanpela sta bilong dispela piksa. Em i bin 14 krismas taim em i bin ek na nau em 17 krismas na i stap long haiskul long Gladstone, Brisbane long Australia.

Taim ol niusman i askim em sapos em i tingting bihainim dispela na laik kamap wanpela biknem ekta long bihaintaim na em i tok "sapos i gat sans na sampela dairekta i askim em long ekt em bai ekt.

Nau yet em i tok em i putim skul bilong em i go pas na laik kamap wanpela Petroleum Engineer long taim bihain.

Em i tokim ol nius lain tu olsem planti lain i askim em i bilong we na long taim em i tok Paupa Niugini planti ol i paul na askim olsem dis-



Ol ekta bilong Mr. Pip

pela kantri i stap we stret.

Na em i save tokim ol olsem PNG i stap antap tasol long Australia.

Ol narapela manmeri insait long dispela piksa tu i no bin save long ekt insait long ol muvi tasol ol i bihainim toktok gut na ekt long ol sampela trupela samting ol i bin lukim na pilim long kraisis insait

long 10 pela yia ol PNG soldia na ol rebel paitman i bin pait long ailan Bogenvil.

Mista Calextus Simeon husat i ekta olsem soldia husait i putim paia long haus lotu long dispela muvi i tok " mi no bilong Bogenvil na mi no bin pilim na save long wanem kain pen na hevi ol lain i bin kisim long taim bilong kraisi tasol



Posta bilong Mr. Pip muvi i bin kamap long Paradais sinema.

ekting long dispela muvi i wokim na mi save long ol hevi na pen ol lain i bin pilim.

Long wankain taim Mista Cales-tus i singaut long gavman long putim wanpela Atoriti bilong muvi o TV na eking long luksave na mekim dispela indastri i kamap bikpela.

Planti kantri long wol i ronim ikonomi bilong ol long dispela muvi

indastri tasol. Yumi tu i gat strong long dispela olsem na yumi mas i gat ol lo na atoriti long lukautim na kontrolim.

Taim yumi no gat dispela atoriti planti mani yumi inap wokim i wok long go aut long kantri.

Nau yet dispela muvi i kamap long Paradise Sinema long Visin Siti, Mosbi, na ol manmeri na pikinini i pulap long lukim.

Pasim buai long NCD na stap helti

MINISTA bilong Helt, HIV/AIDS, Michael Malabag i tok em i sapotim tru Gavana Park long rausim buai long Mosbi siti.

Na em i tok em i laik ol narapela provinsal gavman tu i bihainim wankain pasin na rausim buai long ol bikpela taun na ol distrik taun bilong ol.

"Mi wari bilong wanem pasin bilong kaikai buai i save bringim hevi long helt bilong ol manmeri, na tu em i bagarapim ples. Kaikai buai em i wangepela pasin we i ken bringim sik na kamapim ples tu. Olsem na yumi mas stop long salim buai," Mista Malabag i tok.

Ol haus sik i luksave

olsem long PNG, planti lain i kisim sik kensa long maus em ol lain i save kaikai buai. PNG i go pas tru long wol long namba bilong ol lain i kisim kensa bilong maus. Dispela sik i kamap long pasin bilong kaikai buai long ol liklik pikinini i go long ol bikpela manmeri na ol lapun, long olgeta hap kona bilong kantri.

Mista Malabag i tok, Helt Dipatmen i no gat inap dokta na ol masin na marasin bilong lukim na stretim ol lain i kisim sik kensa. Olsem na taim man i kaikai buai, em i olsem em i laik kilim em yet, olsem na yumi mas stopim pasin bilong kaikai buai.

Mista Malabag i tok namba bilong ol liklik pikinini i kaikai buai i wok long surik i go antap tru. Na mak bilong

wanpela man o meri i ken kisim kensa em long taim em i gat 25 krismas. Dispela i soim olsem long taim wanpela man o meri i kaikai buai long taim em i liklik yet, bihain long em i winim 25 krismas, bai em i ken kisim sik kensa bilong maus.

Moa long 90 pesen bilong ol lain i kisim kensa bilong maus ol i lukim long Pot Mosbi Jeneral Haus sik, i save kaikai buai na planti bilong ol i dai.

Sampela narapela samting i ken kamap long bodi taim

man o meri i kaikai buai em long blut presa bilong em i ken go antap, lewa pam bilong em i ken wok hariap tumas, em bai wari planti, na i ken bagarapim bebi long bel bilong mama.

Kaikai buai i ken daunim ol soldia bilong bodi na taim ol i no wok strong, man i ken kisim kain kain sik. Em i ken mekim isi long kisim sik TB o HIV. Insait long kantri, NCD i gat bikpela namba tru long ol manmeri husat i gat sik TB.

Long dispela as, olgeta lain long Mosbi i stap long mak nogut. Wanpela man i gat sik TB na i no kisim marasin i ken salim TB jem i go long 10 o 15 arapela pipel insait long wanpela yia ol i stap wantaim em.

"Mi sapotim Gavana Park na tok strong long ol pipel bilong Pot Mosbi long lukautim ol yet. Em i bilong gutpela helt bilong yumi olgeta na mi askim ol lain insait long Mosbi long harim na bihainim dispela tok," Mista Malabag i tok.



MINISTA bilong Helt, HIV/AIDS, Michael Malabag.

Pas i go long ol tisa bilong Katolik Ejensi skol

Asbisop Stephen Reichert OFM Cap i raitim (namba wan hap)

"Ol tisa husat i save lusim klasrum olgeta taim, o long wan wan taim, ol i save bagarapim ol pikinini tu. Ol i save lusim nating ol pikinini i stap na i no lukautim ol gut. Dispela em i bikpela rong tru, bilong wanem, kain pasin i ken bagarapim tingting bilong ol pikinini na ol bai i no kamap gut long bihaintaim. Ol tisa i no stap long klasrum i bagarapim tingting bilong ol papamama husat i putim ol pikinini bilong ol long han bilong ol tisa."

Dia ol tisa,

Mi raitim dispela pas long yu, tisa insait long ol Katolik Ejensi Skul, long strongim yu long dispela bikpela wok tru yu karim. Em long skulim ol yangpela boi na gel long mekim ol i kamap ol gutpela Kristen na gutpela sitisen. Yu bai mekim dispela insait long klasrum na tu, yu mas mekim tu long piksa bilong laip bilong yu yet.

Ol pikinini i save harim tok bilong yu taim yu skulim ol. Ol i save mekim ol skul wok yu save givim ol. Ol i kisim bikpela save na lainim planti samting bai helpim ol long laip bilong ol. Olsem na yu mas wok strong, redim gut ol wok bilong yu na yu mas sanap strong olsem gutpela tisa insait long klasrum.

Pasin bilong yu i bikpela samting!


Ol yangpela pikinini i save glasim yu gut olsem tisa bilong ol, insait long klasrum na ausait, 7-pela de long wik. Ol i save stori long yu namel long ol yet. Ol i laik lainim wanem kain pasin bai ol i save bihainim taim ol i gro go bikpela. Olsem na pasin bilong yu olsem marit man o meri, o olsem wanpela bikpela singel man o meri, em i bikpela samting tru. Yu mas traim strong long stap olsem wanpela gutpela man o meri stret long ai bilong ol pikinini na ol i ken bihainim pasin bilong yu.

Husat i namba wan tisa bilong ol pikinini? Dispela em i namba wan wok bilong ol papamama. Yumi mas mekim ol papamama i luksave long dispela na bai ol i ken stat long skulim ol pikinini bilong ol long haus yet taim ol i stap liklik.

Yu tisa i mas tok save long ol papamama long dispela bikpela wok, taim yu save bungim ol long miting o long taim yu bungim ol long narapela wok samting. Mi save mekim dispela sampela taim long taim bilong misa.


Ol papamama i nidim narapela lain long helpim ol long givim gutpela edukesen long pikinini bilong ol. Olsem na yumi gat ol skul we i gat ol save manmeri olsem yu i kisim skul gut long skulim ol pikinini i stap long helpim ol papamama long skul bilong ol pikinini bilong ol.

I go moa long pes 11



INTERNAL REVENUE COMMISSION

TAXPAYER GUIDE



PAYING YOUR TAX BY ELECTRONIC FUNDS TRANSFER

The Internal Revenue Commission is now able to accept payments of taxes electronically. This means that you no longer have to come to our office and queue to pay your taxes by cheque or cash. You can now submit the payment electronically through your bank.

To make an electronic payment of taxes:

Step 1) Work out the payment amount and complete any required tax form

Most tax type has a form that is to be completed when payments are made. Use the standard form that you would normally use for these payments. Include the calculation of the tax payable and sign the form as normal. This provides the details to be used for the payment. For an Income Tax Assessment payment, use the Notice of Assessment instead of a form. Many of the forms are available on the IRC website: www.irc.gov.pg and new forms will be added in the future. If the form that you require is not on the website, please visit your nearest IRC office and they will provide you with blank forms at no charge.

Step 2) Log on to Internet Banking

Use the standard process that your bank has provided for Internet Banking to log on to their system.


Step 3) Process the Payment

The exact details of processing payments will vary from bank to bank:

- For ANZ, go to www.anz.com/papuanewguinea/en/personal/ and follow the prompts;
- For BSP, use the "Internet Banking Transfer" option;
- Maybank internet payments will be available in the future (details to be advised);
- For Westpac, use the "Pay Other" option.

The details of the payment recipient are as follows:

Payee:	Internal Revenue Commission	
SWIFT Code:	BPNGPGPM	
Account number:	43146577	(Note: there is no BSB number)
Address (if required):	Corner of Douglas St, ToRobert Haus, Section 25 Allotment 1, Port Moresby	



Step 4) E-mail the IRC

The tax form must be scanned and emailed to the IRC. Attach the scanned tax form to an email and send it to: payments@irc.gov.pg including the following information in the email:

- Taxpayer's Name and Tax File Number (TFN);
- Tax Type being paid (e.g. G.S.T., Income Tax, Salary and Wages Withholding Tax, etc.);
- Tax Period (the month and year covered);
- Payment date and Amount.

The IRC will then use this information to match the payment and credit your tax account.

Note: failure to send the e-mail to the IRC with the payment details will result in delays in matching the payment and crediting it to your tax account.

Paper forms - there is no need to lodge the paper version of the form except for annual returns such as the Income Tax return. In all other cases a scanned attachment to the e-mail is sufficient. **However, you need to retain your signed paper version of the scanned form for your records, and in case the IRC requests it later.**

Step 5) Receive Receipt

The IRC will send you a receipt notifying you that the payment has been received and posted to your tax account.

Note: with modernisation efforts underway both at the BPNG and at the IRC, this process will change from time to time over the coming months in an effort to make things even simpler and more automated for taxpayers.

Authorised by
Ms Betty Palaso, OBE
Commissioner General

Mama i karim bikpela wari yet

Nicky Bernard i raitim

OL mama save pilim bikpela pen taim ol i karim pikinini, tasol taim pikinini i dai em narapela bikpela pen gen bai brukim lewa bilong ol. Dispela pen bai i no pinis inap mama i dai.

Wasita Bale, em wanpela mama husat i lusim tupela pikinini bilong em long wanpela yia tasol. Wasita em i bilong liklik ples Vunatagia long Kokopo, Is Nu Briten. Em i gat faivpela pikinini. Papa bilong ol pikinini bilong em i dai pinis.

Wasita, i lusim namba tri pikinini meri bilong em long taim sip ya mvRabaul Kwin i go daun long bik solwara namel Finsafen na Kimbe long Februeri 2012. Dispela birua i mekim mama Wasita i wari tru, long wanem pikinini meri i bin lus wantaim liklik bubu bilong



Wasita Bale na las pikinini meri bilong em Alice i sanap long haus bilong ol long Vunatagia, Kokopo. Foto Nicky Bernard.

em. Long taim Wasita na ol narapela pikinini i stap long wari yet, narapela hevi gen i kamap. I no wan mun yet na wanpis pikinini man bilong em i dai long eksiden long Kimbe. Dispela namba tu hevi i mekim Wasita i karim bikpela pen na wari tru.

Pikinini man bilong em i save wok long Benk Saut Pasifik na ol i bin mekim skul wok long hap na pikinini man bilong em i

bin go. Em i las taim Wasita i lukim em. Wankain tu long pikinini meri bilong em. Long taim em i lusim ol long bris na tok gut bai, dispela em las tok-tok em i tromoi long pikinini meri na tumbuna bilong em.

Wasita, i bin go long lotu bilong tingim ol lain i lus long sip wanpela yia go pinis, tasol dispela wari long lewa bilong em i stap yet.

"Mi wok long bihainim kot yet i stap. Kot tu i wok long kamap gut we ol polis i wok long painim ol wok manmeri bilong Peter Sharp na askim ol i stap," Wasita i tok.

"Nau mi gat tripela pikinini meri tasol i stap wantaim mi, na mi no save lusim ol i go longwe. Maski ol i marit, mi tokim ol long kisim man bilong i kam stap wantaim long ples bilong mi stret," Wasita i tok gen.

Yut, Meri na Famili

Pastor Barbara Lunge



Strong bilong Kingdom i stap wantaim ol pikinini man bilong God

Sanap na kisim ples bilong yupela na autim tok profet na winim pait long kirapim kingdom bilong God. "Kingdom bilong yu i mas kam. Mipela i mas bihainim laik bilong long graun, olsem ol i save bihainim long heven." Matyu 6: 10.

"Na Bikpela i putim han bilong em long maus bilong mi, na i tokim mi olsem, "Harim. Nau mi putim tok bilong mi long maus bilong yu na bai yu autim. Nau long dispela de mi givim yu strong bilong bosim ol lain manmeri bilong planti kantri. Mi givim yu strong bilong kamautim ol samting na bilong brukim ol samting, na bilong bagarapim ol samting na bilong daunim ol samting, na bilong wokim ol samting na bilong planim ol samting. Na Bikpela i tokim mi olsem, "Tok bilong yu i stret. Olsem tasol, bai mi was gut long tok bilong mi bilong mekim em i kamap tru." Jeremaia 1: 9,10,12.

Bikpela i salim 70 disaipel ol i go aut long mekim wok, i kam bek wantaim amamas na i tokim em, "Bikpela mipela i bin kolim nem bilong yu, na ol spirit nogut tu ol i bihainim tok bilong mipela!" Na em i tokim ol olsem, "Mi lukim satan i lusim heven na i pundaun olsem lait bilong klaut i pairap. Harim. Mi givim pinis strong long yupela, na yupela bai inap krungutim ol snek na ol binantang bilong bagarapim man, na yupela inap winim olgeta strong bilong satan, dispela birua bilong yupela. Na bai i no gat wanpela samting em inap long bagarapim yupela. Luk 10: 17, 18, 19.

"Orait namba 7 ensel i winim biugel bilong en, na mi harim ol lain i stap long heven i singaut strong olsem, "Bikpela bilong yumi wantaim dispela man em i makim bilong kisim bek ol manmeri bilong en, tupela i kamap king bilong olgeta hap bilong graun. Na Bikpela bai i stap king oltaim oltaim."

"Na olgeta manmeri na olgeta samting long graun bai i save tru long biknem na strong bilong Bikpela. Dispela save bai inapim olgeta hap graun olsem solwara i inapim mak bilong en olgeta." Habakuk 2:14. "Dispela graun wantaim olgeta samting i stap long en, em olgeta i bilong Bikpela tasol. Olgeta ples na olgeta manmeri bilong ples, ol tu i bilong em. Em i wokim graun antap long ol wara i stap daunbilo tru. Na em i wokim as bilong graun namel long solwara na em i laikim long redim ol bilong God." Psalm 24:1-2

"Tasol sampela manmeri i kisim em. Na em i givim namba long ol bai ol i ken kamap pikinini bilong God. Ol i no kamap pikinini bilong God long blut bilong papamama, o long laik bilong bodi, o long laik bilong man. Nogat. God yet i mekim ol i kamap pikinini bilong em." Jon 1:12-13

God i kamapim yu long piksa bilong em yet wantaim pawa na strong bilong bringim bek dispela graun na ol manmeri i go bek long God.

Sapos yu laik toktok moa o yu nidim prea, yu ken rait long: Evangelis Barabara Lunge, ROGIM, P.O. Box 3063. Boroko. NCD. PNG, o ring long BM 67331426 OR 71075829 DG

Sampela bekim i kam long ol rita bilong tok long las wek: "Mi ritim tok bilong yu long Wantok na em i helpim mi, bilong wanem mi save wok long flai i go i kam long wok bilong mi. Long ol man, dispela kain wok em i givim bikpela salens long stap strong wantaim fren bilong mipela. God i ken blesim yu." James, Ok Tedi, Kiunga.

NDB i helpim Ensisi Skul

NESENEL Dvelopmen Benk (NDB) i helpim ken wanpela Papua Niugini meri long lukim driman bilong em i kamap tru long wok bilong skulim ol pikinini long taim ol i liklik yet.

Dispela helpim i kam aninit long NDB Wimen In Bisnis Des. Margaret Kuiaha bilong Is Sepik, i amamas tru long kisim K69,101 sek i kam long WIB Menesa, Janet Kaule, insait long wanpela liklik bung long dispela wik.

Mis Kaule i tok, NDB i kisim luksava tu long helpim long dispela bikpela senis na ol tu i amamas wankain olsem Margaret. Dispela em i namba wan projek aninit long Wimen In Bisnis long helpim wanpela skul.

"Mi gat bikpela amamas olsem mani bilong NDB i kamapim tupela bikpela samting. Namba wan em long helpim bisnis bilong Margaret, na namba tu long givim gutpela edukesen sevis long ol pikinini taim ol i liklik yet," Mis Kaule i tok moa.

Misis Kuiaha i tok, em i bin kisim tingting long kamapim wanpela skul, taim em i lukim namba bilong ol pipel long Ensisi Veli i wok long go antap, na tu em i lukim planti liklik pikinini, krismas bilong ol namel long 18 mun na 5 yia i stap long haus wantaim ol bebi sita o sampela famili taim ol pa-



(L-R) NDB WIB Menesa, Janet Kaule, WIB wokmeri Angela Rex, Faunda bilong Ensisi Eli Sailhud Edukesen Skul, Margaret Kuiaha, WIB Wokmeri, Leonnie Janginen wantaim sampela sumatin long skul i sindaun long taim bilong kisim sek.

pamama i go long wok.

Misis Kuiaha i bin tisa bilong ol liklik pikinini long Ela Murray Intenesenel Skul, aninit long IEA (Intenesenel Edukesen Ejensi), na em i lukim i gat bikpela nid long ol pikinini i mas save long skul taim ol i stap liklik yet.

Save em i bin kisim taim em i tisa long Ela Murray skul i helpim em wantaim save long stretim ol hevi we i save kam wantaim wok bilong skulim ol liklik pikinini.

"Mi bilip olsem taim yumi

putim ol dispela pikinini long skul em bai redim ol pikinini long rot bilong lainim samting long taim ol i liklik yet," Misis Kuiaha i tok.

Eli Sailhud Edukesen Skul bilong Margaret i stap long Soweto Strit long Ensisi Veli. Wanpela skul pikinini bilong em, i gat 16 mun tasol. Skul em i kisim ol pikinini i gat 18 mun i go inap long 5-pela krismas. Ol i was long ol pikinini na long wankain taim ol lainim ol long foniks, o we bilong kolim ol leta bilong alfabet, isi

namba, art, ol gems na pilai taim.

Helpim bilong NDB Wimen In Bisnis Des bai helpim skul long wokim gutpela ples bilong pilai, tripela toilet long sais bilong ol liklik pikinini, ples bilong wok, laibreri kona, kona bilong slip malolo, ol samting bilong pilai na ol samting bilong wok long opis.

Margaret i tok tenkyu long Misis Kaule na ol tim bilong em long NDB WIB des long gutpela helpim long mani.

Hohola Yut Grup klinim Eki Vaki Praimeri Skul

HOHOLA Yut Grup i wok aninit long projek bilong Wol Benk, i kisim nupela yunifom, sefti but na i stat long klinim Eki Vaki Praimeri Skul long Hohola wan stat long Tunde 8 Oktoba.

Ol i stat wok long 8 klok moning na bai ol i pinis long 2 klok long apinun. Wanpela yut, Tracy Digeipa i tok, ol bai klinim ausait long banis, na bihain bai ol i go insait long skul na klinim long insait.

Dispela projek bai i go inap 40 de o tripela wik. Dispela projek i no wankain olsem ol narapela i save kamap bipo. Nogat.

Dispela projek i stat wantaim wanpela tu wik Besik Laip Skil Trening program long las mun.

Olgeta yut i rejista na i go insait long program bilong klinim siti. Wan wan bilong ol i kisim iD kat na projek i opim BSP

akaun bilong ol. Bihain long 2 wik ol bai kisim pe long mak bilong K2.29 long wan aua.

Dispela trening program bai helpim o yut long stretim ol grup bilong ol na rejista, kisim ol iD na opim ol seving akaun na bai ol i ken kisim sampela ol liklik wok olsem kontrak bilong klinim ples long mekim mani bilong helpim ol yet na famili bilong ol.



Wanpela meri yut, Tracey Digeipa i stat long klinim ausait long banis bilong Eki Vaki Praimeri Skul, Hohola. Foto: Frieda Kana



MIPELA I WOKBOI NATING

Sampela yia i go pinis, mi bin ridim dispela stori. Long wanpela de, i gat wanpela lapun man i kam long haus bilong pater long autim wari bilong em.

Namel long toktok wantaim pater, lapun i komplem long hevi em i bin karim long laip bilong em. Em i bin mekim planti wok bilong God insait long Sios, stat long taim em i stap liklik pikinini yet. Tasol wanem samting em i bin kisim?

Em i tok; "long taim mi stap liklik boi yet, mi bin kamap alta boi, long sevim pater long alta long taim bilong santu misa. Taim mi kamap yangpela boiyut, mi joinim kwaia long singsing long haus lotu. Taim mi nupela marit yet, mi joinim narapela long kamap lekta, long ridim Tok bilong God long taim bilong misa. Bihain mi kamap komunio minista, bilong helpim pater long tilim santu komunio insait long haus lotu. Bihain long misa mi karim santu komunio i go long ol sik manmeri long haus sik o long haus bilong ol yet."

Sapos sakristan (man bilong redim olgeta samting bilong misa long alta) i sik, mi bin kisim ples bilong em long mekim redi olgeta samting bilong misa. Taim pater i go wokim misa long komyuniti o klasta, mi save go wantaim pater.

Tasol wanem samting God i bin givim mi? Em i bin givim mi planti hevi insait long famili na laip bilong mi. Pikini bilong mi i bin dai long kar eksiden taim krismas bilong em namel long 14 na 15 yia. Wanpela pikinini meri bilong mi i bin dai long kensa. Bihain meri bilong mi tu indai long wankain sik, kensa. Bipo mi kam lukim pater, mi bin go sek ap long haus sik. Dokta i bin painimaut olsem mi i gat bikpela sik long lewa/liver bilong mi".

Em i askim pater; "Dispela kain wei God i bekim/peim olgeta samting mi bin wokim insait long sios?". Em i askim pater wantaim krai. Planti aiwara i kapsait antap long pes bilong em.

Olsem wanpela gutpela peris pris, pater i sindaun isi tasol na harim krai na wari bilong lapun man. Bihain pater i opim Baibel na i ridim dispela stori long Luk 17: 10: "Mipela i no gutpela wokboi, samting mipela i mekim em i wok tasol bilong mipela (We are unprofitable servants, we have done what we were obliged to do).

Gutnius bilong Luk i soim olsem Jesus i mekim yumi luksave gut olsem God i no gat wanpela dinau long yumi. Yumi manmeri bilong graun tasol i gat planti dinau long God. God i no olsem wanpela akaunt bilong wanpela kampani husat i baim yumi long wanem samting yumi bin mekim long em. Long laik bilong em tasol God i bin givim planti marimari, blessing na grasia long yumi insait long laip bilong yumi.

Blesing na grasia yumi kisim, i no olsem wanpela gutpela bekim God i givim yumi bikos yumi bin wokim planti wok. Nogat! Em i **MAK BILONG LAIK BILONG EM LONG YUMI** (Signs of his love for us). Jisas i mekim klia dispela tok bikos, farisi i save kaunim olgeta gutpela samting ol i wokim na askim God long bai bekim hatwok bilong ol (Luk 18: 9-13).

Olsem na yumi mas tingim gut; God i no wokim injastis long yumi sapos God i larim yumi karim hevi na pen. Jisas Pikinini bilong em, Maria, aposel na planti ol santu i bin bungim hevi na wari tu.

God i larim hevi na wari i kamap long laip bilong yumi bilong redim yumi i go long laip bilong amamas oltaim insait long Kingdom bilong em. Olsem na, **NO KEN BLEMIM GOD!**

Baptis Sios lusim painia pasta

Sape Metta i raitim

MOA long 70,000 sios memba bilong ol Baptis Sios i sori bihain long indai bilong painia o namba wan ministai go long hap na faunda bilong Baptis Sios long PNG, Reveren Pasta Tania Tia.

Pasta Tania em bilong Nupagimi hauslain long Henganofi distrik, Isten Hailans, tasol em i bin lusim ples bilong em long taim em i yangpela man tru na i go daun long Wau long Morobe provins.

Long Wau em i bin kirapim namba wan Baptis sios bilong PNG long hap. Na em i bin wok hat tru olsem wanpela yangpela minista bilong gutnius inap 35-pela yia olgeta na ritaia long Septemba



PASTA TANIA: Ol Pasta bilong ol Baptis Sios long Isten Hailans i karim bodi bilong Reveren Pasta Tania Tia i go long haus krai long Nupagimi viles. **Poto: Sape Metta**

16, 2012.

Na bihain long wanpela yia, pasta Tania i dai long Ogas 30 long mun i go pinis long em i painim sik long kidni bilong em.

Olkongrigesen bilong em

long Wau i bringim bodi bilong em i go na planim em long hauslain bilong em long Nupagimi long Sande.

Pasta Tania lusim meri bilong em Vike5-pela pikinini 5-pela tumbuna.



Ol mama long KASA komyuniti i karim Santu Mama i go aut long haus lotu

Long las wik Tunde, Sen Peter Channel Peris long Erima i bin makim dispela de wantaim misa long statim wokabaut bilong ol insait long mun Oktoba, em mun bilong Mama Maria. Ol bin statim wantaim prea rosari i go long Mama Santu.

Dispela de tu i makim pestode bilong Santu Teresia bilong Pikinini Jisas, em i wanpela virgo, relieis na tisa billong sios.

Pas i go long ol tisa bilong Katolik Ejensi skul

I kam long pes 9

Insait long ol haua we pikinini i stap insait long klasrum, em yu kamap olsem papa na mama bilong em stret. Yu ken kamapim planti gutpela samting sapos yu gat gutpela bel isi na save na yu save wok strong, na tu, yu ken bagarapim ol pikinini sapos yu no gat gutpela save na pasin bilong lukautim na skulim ol.

Planti bilong yu tisa em papa o mama tu, olsem na yu ken soim gutpela piksa long ol papamama bilong ol sumatin long pasin bilong yu wantaim famili na pikinini bilong yu yet. Skulim ol pikinini bilong yu planti samting long haus bilong yu, bipo long ol i statim skul. Ol i ken lainim pasin bilong rit na raitim ABC, na save long kauntim

namba, lainim nem bilong kain kain samting na lainim tok Inglis.

Pasin bilong yu yet long haus i soim pasin yu bai stap wantaim ol arapela long komyuniti. Ol sumatin bilong yu na ol papamama bilong ol i kisim gutpela samting long gutpela pasin bilong yu. Stretim pikinini bilong yu taim ol i mekim rong. No ken wokim wantaim belhat na swea o paitim em. Sapos yu inap long stretim pikinini bilong yu yet long gutpela pasin, yu bai kamap gutpela piksa insait long komyuniti.

Tingim dispela, taim pikinini bilong yu i gat 2, 3, 4 o 5 krismas tasol, ol i save lainim pasin i kamap insait long famili na komyuniti long olgeta de. Ol pikinini save

lain long laikim ol narapela long pasin bilong papamama bilong ol yet.

Ol i save lainim pasin bilong tok tru sapos ol papamama i save tok tru. Ol i save lainim rispek sapos papamama i soim rispek. Ol boi i save lainim long rispektim ol susa bilong ol na ol narapela pikinini meri taim ol i lukim papa bilong ol i mekim gut na rispektim mama bilong ol.

Em i wankain tu long piksa nogut ol pikinini i save lainim long ol bikpela manmeri. Planti pikinini i save bihainim rot nogut taim ol i lukim na bihainim pasin bilong ol bikpela manmeri husat i stap klostu tumas long ol.

(moa long neks wik)



Bel hevi i no inap stretim kapital siti bilong yumi

LONG wol kapital siti renking, Pot Mosbi kapitol siti bilong yumi em ol i putim olsem wanpela doti na sting siti. Em i mak bilong bikpela sem.

Na mi no klia, yumi save lain i pilim olsem wanem. Tru mi i stap 10-pela krismas nau long Mosbi, kapital siti na lukim olsem siti bilong yumi i bagarap na sting nogut tru. Yumi lukim pipia i stap long olgeta hap.

Buai spet, buai skin na buai sel i kisim ples long siti na i no gat wanpela minista o memba o Praim Minista i kamap long nius pepa o EMTV na edresim dispela hevi.

Em i no wok bilong Gavana Powes Parkop tasol na larim em i swet i stap. Em i wok bilong yumi wan wan long lukautim siti bilong yumi.

Siti em nem nating, tasol taim yumi i stap insait long siti em yumi pipel tasol yumi siti. God i kamapim yumi spesel na givim yumi sans long tingting na mekim samting.

Em i no givim yumi longlong tingting, nogat! Em i kamapim yumi olsem em yet na givim yumi gutpela tingting long tingting na mekim wok.

Tru enimal i no gat tingting na ol i save mekim nabaut. Olsem na yumi i no ken kamap enimal moa.

Yumi bai sela na yumi save kaikai buai long en, traim na wokabaut long olgeta kona long Pot Mosbi siti na traim lukluk raun, siti i stap gut o nogat?

Wanem samting i rong na Gavana Powes Parkop i tok no gat buai long siti. Yumi inap wok bung wantaim gavana na kamapim gutpela siti, nogat!

Yumi komplem gen long bagarapim siti. Tingim, **MR. BUAI EM I NO TUMBUNA SAMTING BILONG YUMI HAILENS. EM I SAMTING CULTURALLY BILONG OL NAMBIS LAIN NA OL I SAVE YUSIM BUAI LONG SPESEL BUNG TASOL.** Lukim dispela em i bikpela sem stret long yumi. Yumi mekim olsem buai i kamap bipo na mekim olsem yumi onim.

Olsem na sapos yumi glasim gut yumi tasol, yumi bagarapim siti na sapos olsem yumi ken kolim nupela kapital siti.

"The Red Buai City" Tru tumas, mi save painim hat tru long lukim ol turis long Gordens maket, Boroko o Waigani maket.

Em olsem wanem, bikos ol turis i lukim pinis siti i sting na doti nogut olsem na ol i les long wokabaut na lukluk raun.

Sapos yumi go long Rabaul, Alotau o Mt. Hagen bai yumi lukim ol turis i pulap tru na lukluk raun long maket na taun bikos ol pipel i lukautim gut taun bilong ol na i stap klin.

Em nau yumi mas sanap na wok bung wantaim gavana bilong yumi NCD na mekim kapital i luk nais na gutpela.

Mi putim singaut i go long ol palamentarien, i no ken i stap long haus tambaran na bihainim paus mani bek bilong yumi pipel i stap.

Traim na kam helpim Gavana Powes Parkop na kamapim gut siti bilong yumi olsem pipel.

WOL NIUS LONG POTO



Praim Minista bilong Australia, Tony Abbott i tok em i laik stongim wok bilong tred wantaim Saina bihain long em i bungim Presiden Xi Jinping. Mista Abbot i bin toktok wantaim presiden bilong Saina arasait long bikpela miting bilong APEC long Bali, Indonesia long dispela wik.

Kaikai i sot long ol liklik ailan bilong Bogenvil

Dispela wari bilong kaikai i sot long ol liklik ailan bilong Bogenvil i stap yet tasol nau em i kamap bikpela moa.

Bikman bilong Tasman Ailan, Taehu Pais i tok ol liklik ailan olsem Tasman, Kateret na Nuguria i gat bikpela hevi nau bikos ol i sot long kaikai. Em i tok nainpela mun nau na sip i no bringim kago i go long ol dispela ailan olsem na kaikai i sot tru.

Narapela wari tu em ol gaden kaikai i wok long pinis bikos long klaimet senis. Solwara i wok long go insait na bagarapim graun na kilim ol kaikai long gaden.

Ol haus sik long PNG i pulap long ol bodi

Ol famili i no save go kisim ol bodi long ol haus sik hariap na go planim.

Tessi Soi bilong Friends Foundation i tok mog long haus sik i pulap bikos ol famili i no save go kisim ol bodi

Planti famili i no go kisim bodi long planim bikos ol i no gat mani long mekim wok bilong planim, na sampela i save sem long taim lain bilong ol i dai long sik HIV na AIDS.

Tessie Soi i tok sampela taim ol famili i no save olsem lain bilong ol i dai na bos i stap long mog, olsem na ol i putim ol nem long ol niuspepa we ol famili memba i ken lukim na go kisim bodi i go planim.

Solomon Ailan polis wok wantaim haus sik

Ol polis long Solomon Ailan i wok bung wantaim ol klinik na haus sik long daunim hevi bilong lo na oda long kantri.

Sif Suprintenden Gabriel Manelusi bilong Honiara siti polis i tok ol i statim dispela nupela program long mun Septemba.

Em i tok bikpela tingting bilong em i bilong wok wantaim ol klinik, na bikpela haus sik long kisim tok save long wanem ol samting i kamap.

Sif Suprintenden Manelusi i tok sapos ol pipel i kisim bagarap na i go long haus sik o klinik long kisim tritmen, ol wokman long dispela klinik o haus sik i mas toksave long polis olsem wanem ol i kisim dispela bagarap na polis nau bai i go mekim wok painimaut.

Tony Abbott laik strongim tred wantaim Saina

Praim Minista bilong Australia, Tony Abbott i tok em i laik stongim wok bilong tred wantaim Saina bihain long em i bungim Presiden Xi Jinping.

Mista Abbot i bin toktok wantaim presiden bilong Saina arasait long bikpela miting bilong APEC long Bali, Indonesia long dispela wik.

Mista Abbott i tok em na presiden bilong Saina Xi Jinping i bin tok orait long apim tred namel long tupela kantri.

Tupela lida nau i stap log Bali long Asia Pacific Economic Cooperation (APEC) samit, na dispela ol toktok i makim namba wan miting bilong Mista Abbott austait long samit.

Praim Minista Abbott i bin tokaut na luk-save long pawa bilong Saina na i tok long bikpela laik bilong em long strongpela wok bung bilong tred.

Em i bin tok, dispela strong bilong bilong Saina long tred bai i helpim wol. Em i tok dispela i no wanpela salens.

Em i tok gutpela wok bisnis namel long Saina na Australia i strongim tred namel long tupela kantri.

Mista Abbott i tok Australia i gat strongpela rilesensip na em i laik tupela kantri i ken strongim moa yet long ol yia i kam bihain.

Mista Xi i bin tok amamas long ol toktok bilong Abbott.

Em i tok em i bilip olsem tupela i impoten kantri long Asia-Pacific rijon. Na Saina na Australia i ken wok bung na tu.

Mista Xi i bin invaitim Mista Abbott long go lukluk raun long Saina long neks yia.

PNG redi long wol kap ragbi lig

PNG Ragbi Lig tim, ol Kumuls i redi nau long go pilai long Ragbi Wol Kap Sempionsip long Ingran. Ragbi Lig Wol Kap long Ingran bai kamap long tripela wik na ol kantri bai stap insait long dispela sempionsip i stat nau long redi.

Nu Silan husat i holim taitel long 2009 bai taim strong bilong em long defendim taitel bilong em long dispela sempionsip.

Papua Niugini nau i wok long redim tim bilong em long pilai long dispela sempionsip.

Na stap NRL grend fainol bilong dispela yia, Sydney Roosters i primia bilong 2013, long taim ol i winim Manly 26-18.



AUSTRALIA: Ol Paia Briget i mekim bikpela wok stret long kilim dai paia long westen Sydney supamakot. Pastaim i gat wanpela bikpela pairap long dispela supamakot we paia i kirap. Tupela man i lus yet long dispela asua na ol i wok long painim ol yet. Ol 9-pela manmeri na 7-pela polisman i kisim bagarap long dispela paia taim bikpela pairap i kamap na brukim dispela tu-stori haus long Station Strit long Wentworthville long 4.30 bik moning. Sevenpela pela polisman i kisim bagarap long smuk bilong paia.



BALI: Praim Minista bilong Australia, Tony Abbott (R), werim klos endek, tumbuna klos bilong Bali, i kamap wantaim meri bilong em, Margie long fewel kaikai long Bali. Em i pinisim namba wan intanesenel konfrens bilong em long dispela de long kirapim toktok long tred agrimen na sampela ol ki bung long foren pawa long sait. Mista Abbott i stap long Bali long bung bilong Asia Pasifik Ekonomik Konfrens (APEC) samit we em bin mekim sampela ol toktok pinis wantaim ol lida bilong Saina, Singapo, Thailand, Mexico na Canada. Em na meri bilong em i go long gala dina wantaim ol arapela rijinel bikman.



AL QAEDA: Ol Amerika fos i lonsim tupela wankain reid long Libya na Somalia long painim Islamit militan Al Qaeda lida man husat i bin bomim tupela US Emasi long 1998. Abu Anas-Libi i bin stap hait long 15 yia na US gavman i wok long painim em long dispela tupela boming long US embasi long Kenya na Tanzania. Long dispela bagarap 200 manmeri i bin dai. Ol i bin kisim em long traipela moning long Tripoli, bikpela siti bilong Libya.

Ol komyuniti tu i mas helpim UBE



Papua Niugini bai winim mak bilong Yunivesal Besik Edukesen (UBE) long yia 2015 o nogat?. I luk olsem bekim bilong dispela askim em nogat, yumi no inap winim dispela mak. Las wik, ol saveman bilong Nesenel Risets Institut long Mosbi i putimaut wanpela buk i gat ripot bilong Yunivesal Besik Edukesen na wanem kain ol program Edukesen Dipatmen na gavman i kamapim long lukim dispela aidia i karim kaikai.

UBE plen bilong Dipatmen bilong Edikesen i karamapim yia 2010 i go inap 2019. Dispela plen i tok UBE i karamapim ol dispela eria, Akses – we olgeta pikinini i mas go long elementeri skul long taim ol i winim 6-pela krismas; Retensen – olgeta pikinini i mas stap long skul inap ol i pinisim 9-pela yia long elementeri na praimer skul, na Kwaliti – olgeta pikinini i mas winim mak bilong rit na rait na save long kaunim namba long taim ol i pinisim dispela 9-pela yia long skul.

Dispela em sotpela eksampel bilong as bilong UBE. Gavman bilong Papua Niugini i strong olsem olgeta pikinini long kantri i mas skul inap nainpela yia long praimer skul level. Tasol tude i gat luksave olsem dispela driman bilong gavman na ol papamama tu bai i no



inap kamap. I gat planti risen na yumi no inap winim gol kantri i makim we yia 2015 bai PNG i ken tok olgeta pikinini i stap long skul.

Ol saveman husat i wok

long stadi long ol program bilong gavman long putim ol pikinini long skul i tok i gat planti samting i stopim kantri long winim dispela mak. Wanpela bikpela samting

yumi mas luksave long en em dispela program bilong UBE bai i no inap long wok gut long olgeta provins. Wan wan provins na distrik tu i gat hevi bilong ol we bai

kamapim ol rot blok long wok bilong kamapim UBE long ol skul. PNG i gat ol bikpela maunten, na solwara i brukim ples we populesen i stap. Long sampela ples, skul i mas sanap klostu long ples we ol pikinini i ken go skul isi tru. Sampela skul i mas gat moa klasrum na tisa bikos namba bilong ol pikinini i bikpela tumas na ol i sot long spes. Ol pikinini i no gat spes long sindaun na tisa bai i no inap long skulim gut planti pikinini tumas. Moa skul i wok long pilim dispela pen bikos nau i gat fri edukesen na moa pikinini i kapsait long skul.

Tasol yumi no mas rabisim hariap dispela program bilong kamapim UBE long ol kantri. Ol saveman i spendim planti yia long wok wantaim ol tisa na skul long ol kain kain ples insait long PNG na ovasis tu, na ol i kamapim program. Bikpela samting yumi olgeta i mas mekim nau em long pasim tingting long kamapim tru UBE long kantri. Taim bilong toktok i pinis. Nau em i taim bilong kirapim wok.

Ol papamama i ken givim han tu long ol skul. Givim taim long mekim wok long helpim skul. Planti skul i sot tru long ol gutpela manmeri i helpim skul bod long mekim wok raun long skul. Long taun i no gat planti strongpela grup bilong papamama na komyuniti i sanap baksait long ol tisa na givim gutpela helpim long skul. Yumi pulap tru long komplein na toktok. Tasol long taim bilong wok bai yumi ranawe na larim

het tisa na skul bod tasol long painim ansa long ol hevi i kamap long skul.

Wankain olsem ol arapela kaikai yumi planim long gaden. Sapos yumi lukautim gut gaden na rausim gras nogut na ol binatang, bai gaden i karim gutpela kaikai. Sapos yumi giaman mekim les wok nabaut, bai yumi lukim ol rabis kaikai tasol. Ol pikinini bilong yumi tu i wankain. Nau em i taim bilong soim trupela kala bilong yumi na stretim rot bilong ol.

Ol rot bilong putim pikinini i skul inap nainpela yia i stap. Givim moa mani long mekim wok bilong UBE, givim gutpela trening long ol tisa na bai ol tu i mekim gut wok, wokim moa klasrum na moa pikinini na tisa i ken amamas na stap long skul, na mekim ol risets wok long glasim ol hevi na traime long stretim hariap. Yumi lukluk tasol bai hevi i kamap bikpela na bihain bai i bagarapim gutpela program ol saveman i bin putim long helpim ol pikinini bilong yumi.

Yumi mekim olsem na lusim gutpela hanmak i stap long gutpela sindaun bilong ol pikinini long bihaintaim. Ol yet na ol tisa tu i no inap long kamapim senis. Ol i nidim sapot bilong komyuniti na ol gutpela manmeri long helpim ol. Ol praimer skul bilong yumi em yumi givim nem komyuniti skul long ol. Orait, komyuniti i mas opim ai nau na go pas long stretim ol bagarap i wok long kamap na stopim ol skul long winim mak bilong UBE insait long kantri.

No ken rausim elementeri edukesen: Tapo

Stanley Nondol i raitim

EKTING Edukesen Sekreteri Dokta Michael Tapo i tok elementeri edukesen em i gutpela long givim save long ol pikinini na tok gavman i no ken rausim elementeri edukesen long kantri.

Dokta Tapo i mekim dispela totok las wik long Mosbi taim em givim K10,000 i go long Hohola Demonstresen Skul na Wardstrip praimer skul long givim luksave long ol tisa bilong tupela skul i kisim save long skulim elementeri sumatin long nupela pasin bilong rit ol i kolim Joli Foniks.

Joli Foniks em olpela edukesen seketeri Dokta Joseph Pagelio i wok long skulim long ol tisa, na bai ol tisa i yusim long skulim ol elemneri sumatin. Dispela pasin i bilong lainim long toktok long ol wan wan wod long wei bilong em na

taim ol go het long gret wan na go antap em bai isi long ol save na toktok long Tok Inglis gut.

Moa long 77,000 pikinini long elementeri skul i no save long rit long Tok Inglis na dispela em i wanpela bikpela hevi long ol skul.

Ripot bilong Nesenel Risets Institut las wik tu i saptom toktok olsem ol sumatin long gret 8 na tu long 10 i no save mekim gut Inglis eksem na planti i save feil long Tok Inglis.

Mista Tapo i tok gutpela rot long mekim ol sumating save rit na rait gut long tok inglis em long lainim lol long rit na rait taim ol liklik yet long elementeri na Joli Foniks em i gutpela tru.

Joli Foniks i ken go long olgeta elementeri skul long kantri bihain long edukesen dipatmen i lukluk kaikai bilong em long tupela skul long NCD.

Ol tisa bilong tupelo skul i



Ol sampela elementeri sumating amamasim Independens de.

wok long kisim trening wantaim Dokta Pagelio stap long lainim

ol sumatin nupela rot long lainim long Tok Inglis.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea Telephone: (675) 325 2500 Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga Acting Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest or its absolute discretion. The publisher's general terms acceptance are available at Word Publishing Company Ltd and are set out full on the display advertising form.

Kokopo taun bai kamap siti bilong Niugini Ailan

Nicky Bernard i raitim

KOKOPO em i wanpela taun long Sauten hemesfia we em gro hariap tru bihain long tupela maunten paia bin pairap na bagarapim Rabaul taun.

Long 1980 i kam long 1990, Rabaul i bin wanpela top taun bilong ol pipel bilong Niugini Ailan. Stat long Manus i kam long Nu Ailan, Bogenvil na Wes Nu Briten, olgeta i save raun i go long Rabaul taun long kisim ol samting bilong stua, ol material bilong wokim haus na ol arapela bikpela samting. Rabaul i olsem wanpela liklik siti bilong ol.

Tasol long 1994, olgeta samting i stop long Rabaul taun. Tupela bikpela maunten paia bin pairap na das bilong tupela maunten i bagarap dispela liklik siti bilong ol NGI.

Planti ol manmeri na pikinini bilong ol narapela provins i bin lusim Rabaul na go bek long provins bilong ol. Sampela bilong ol NGI bin stap bek long lukim siti bilong ol das i bin haitim.

Planti pipel i bin ting olsem Rabaul taun i pinis nau na bai i no isi long kirap gen. Tasol ol pipel bilong Is Nu Briten i bungim het na kamapim bek wanpela taun bilong ol long Kokopo.

Kokopo i bin wanpela liklik taun bipo long maunten paia i pairap. I gat ol liklik stua olsem ol taka bokis i stap na sampela ol bisnis long helpim ol pipel husat i stap long hap i go olsem long Kokopo.

Long pinis bilong 1990 na go long 2000, Kokopo i kamap olsem papa bilong em Rabaul taun. Planti long ol dispela stua na bisnis long Rabaul we das bin bagarapim, em ol namba wan lain long sanapim ol stua na bisnis bilong ol long Kokopo.

Tude em klostu long 18 yia nau Kokopo stap olsem nupela taun bilong Is Nu Briten. Tasol dispela taun i wok long gro yet. Planti lain i wok long go long Kokopo long statim bisnis bilong ol.

Dispela provins tu i ken pulim planti turis long go raun na lukim ol ples bilong namba tu wol woa, dispela tupela maunten paia, ples we ol Japan i bin haitim ol sabmarin sip bilong ol, ples bilong swim na daiv long solwara, ol hul ol Japan i bin digim long maunten na hait long taim bilong woa. Ol pipel bilong Is Nu Briten i lukautim gut ol dispela samting na nau ol visita i ken raun na lukim.

Nau yet smok o das i wok long kam aut yet long maus bilong wanpela maunten paia tasol ol bikpela sip i wok long go sua yet long bikpela bris long Rabaul taun na rausim ol kago. Dispela maunten paia i wok long pulim ai bilong planti manmeri, sampela bilong ol pailot i save kisim balus i go klostu na toksave long ol pasindia long lukim dispela maunten paia.

Sampela asples arere long sait bilong maunten paia i go bek long liklik ples bilong ol na kamapim bek sidaun bilong ol. Maski maunten paia i tromoi das, ol i les long lusim ples bilong ol. Planti bilong ol i kisim blok long hap long Kokopo na kamapim nupela sidaun na ples bilong ol.

I luk olsem bihain long 5 yia bai Kokopo i kamap wanpela liklik siti bilong ol Niugini Ailan, na ol pipel bilong Niugini Ailan bai i no inap kam long Lae na Mosbi long kisim ol samting. Bai ol i go long siti bilong ol yet long Kokopo na kisim ol samting.

Ol i tingting long kamapim bek Rabaul

taun. I gat wok painimaut i kamap nau long kisim ilektrik pawa long maunten paia na givim i go long taun. Sapos dispela plen bilong ol pipel i kamap tru Rabaul taun bai resis gen wantaim Kokopo taun

Rabaul na Kokopo taun i join wantaim kain kain rot bilong kar, maski ol gat planti kar tasol rot bilong ol i no save pas olsem trefik long Mosbi. Dispela tupela taun i gat planti rot, sapos yu stap long bus na yu laik go long Rabaul taun o bikpela haus sik long Noga i gat bikpela rot i stap long bus sait. Na sapos yu laik bihain nambis i gat bikpela rot i stap.

Ol bikpela bisnis olsem Ela Motos, Boroko Motos na ol narapela bikpela bisnis olsem ol wea haus, ol i sanapim arere long bikpela rot, stat long Tokua ples balus i kam kamap long taun stret. Ol liklik stua na bekeri i sanap i go olsem long sait bilong nambis.

Dispela man husat i plenim Kokopo taun i gat bikpela save tru, planti ples bilong mekim bisnis i stap yet na taim planti bisnis haus i go na sanapim bisnis, tru tru Kokopo bai kamap wanpela liklik siti.

Planti ol ges haus i kamap nau long Kokopo long wanem planti manmeri na ol gavman opisa i save go na kamapim ol bikpela miting long hap. Na tu ol turis i wok long go long Kokopo nau long lukluk raun long ol samting bilong woa bipo na long maunten paia.

Sapos yu laik malolo na rileks gut orait, wanpela provins yu mas tingting long go raun isi em Is Nu Briten. Long dispela provins bai yu kisim gutpela malolo na gutpela tingting na bihain yu ken kam bek gen long wok bilong yu.

Kokopo taun em best ya!

Maunten Paia



Kokopo Taun





Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wanpela singsing b'long bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - NIUS - YUMIFM Nius Senta

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TUNDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TRINDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FONDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FRAIDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

Raun wantaim Wantok kru ...

Blu Lagun ples bilong amamas na pulim ai

Nicky Bernard i raitim

WANPELA liklik hap long Is Nu Briten Provins i save pulim ol manmeri na turis em Blu Lagun.

Blu Lagun em tempela minit draiv long Kokopo bipo yu go olgeta long Rabaul taun.

Dispela liklik hap i no gat wesan long em, ol blakpela ston tasol i raunim na solwara bilong em i blue tasol i kam olgeta long ol dispela blak pela ston.

Planti turis save go daiv long en long wanem i gat planti samting i stap long dispela hap, ol pis i no save isi long dispela hap tu.

Long wiken dispela liklik ples i save pulap long ol pikinini long ol ples klostu, long wanem i gutpela

ples bilong waswas. Ol bai ron tasol long rot i go na kalap tasol go daun solwara. Dispela solwara tu em i daun stret na i blu kam olgeta long bik rot bilong kar.

Blue Lagun tu save pulim ai bilong plantii manmeri husat i raun go long Kokopo o Rabaul I gat gutpela ples bai yu sidaun na lukim tupela maunten paia, lukluk go bek long Rabaul taun na tupela ailan ston na lukim tu ol

bikpela sip i ran go long bikpela bris long Rabaul.

Long sait bilong rot long Blue Lagun tu i gat ol hul ol Japani i bin digim long hait long en, dispela ol hul i stap yet na save pulim ai bilong ol manmeri na pikinini.

Tru tru Blu Lagun em ples bilong amamas na pulim ai, na tu i ken pulim moa turis long go lukim dispela liklik hap ples.



Ol asples pikinini i kalap go insait long solwara long Blue Lagun.

Ol mangi stap insait long solwara bilong Blue Lagun. Poto Nicky Bernard.

EMTV Television Guide

FONDE OKTOBA 10, 2013

4:57 AM G AUSTRALIA NETWORK
5:00 AM G JOYCE MEYER - 1047-4
5:30 AM G EMTV NEWS REPLAY
6:00 AM G TODAY
09:00 AM GENERAL VIEWING Classroom Broadcast

5:30 PM G TRAPPED YR.1 EP#23/26
6:00 PM G EMTV NATIONAL NEWS
7:00 PM G RAIT MUSIK EP#183
8:00 PM G RESOURCE PNG EP#91

FRAIDE OKTOBA 11, 2013

4:57 AM G AUSTRALIA NETWORK
5:00 AM G JOYCE MEYER - 1047-5
5:30 AM G EMTV NEWS REPLAY
6:30 AM G TODAY

10:40am Grade 8 Mathematics
11:20am Grade 8 Science
1:00pm Grade 6 Mathematics
1:50pm Grade 6 Science

SARERE OKTOBA 12, 2013

4:57 AM G AUSTRALIA NETWORK
6:00 AM G EMTV NEWS REPLAY
7:00 AM G IN HIS STEPS EP#5
7:30 AM G ULTIMATE GUINNESS WORLD

9:30 PM PGR HOMETLAND EP#5 - Repeat
10:30 PM G EMTV NEWS REPLAY

SANDE OKTOBA 13, 2013

4:57 AM G AUSTRALIA NETWORK
6:00 AM G EMTV NEWS REPLAY
6:30 AM G IT IS WRITTEN
7:00 AM G HILLSONG

TORO



BIABIA



KANAGE



TOKWIN

Insait wok..

Nogat moa wok, polis mas sekim ol wokman bilong G4S long pasim stil i kamap long moni bilong May Benk. Hau bai ol raskol i save olsem dispela amo kar bilong G4S i karim K6milien insait long kar? Winim William Kapris..Putim baunti long het bilong ol na mekim save long ol. Nogat moa tok.

Hostej drama...

Yu ting ples olsem Alotau i gut-pela ples tru we kain pasin olsem kidnap no inap kamap long ol dispela ples?.. Tingting gut gen! Sikspela raskol i kidnapim

wanpela bisnis Korea man na femili bilong em na karim ol i go na stil long bikpela stua na taim polis i kam, ol i kisim ol na kalap long dingi na raunim ol liklik ailan bilong Alotau we ol i lusim ol na ronawe..tenyu tru, em ol dispela femili i orait na ol i no kisim bagarap...pasin yumi save lukim long ol muvi tasol...

Buai ban mekim prais i go antap..

Buai ban long NCD i mekim nau ol prais bilong buai i go antap moa. Nau ol manmeri i go salim buai long haus bilong ol sasim wanpela long K2..Yu kaikai buai long hap, spet na yu ken go autsait. Tambu tru long spet long pablik rot...Yu

gat K50, yu ken spet autsait long pablik ples. Sapos nogat, jes daunim buai na klinim maus.

Sapos bel i pen, em yu yet nau! Spak pik...

I gat wanpela pik husat i save stilim bia bilong ol turis i stap long Perth Australia. Ol turis i singautim em Swino, wok long stil long ol kemp bilong turis long wanpela pak. Wanpela taim em stilim 18-pela ken bia na em dring na em spak nogut tru na wokbaut long rot i stap na wanpela trak i kam bamim em kilim dai..

Olsem ol i tok, noken spak na long long nabaut long rot...

Tokwin Tasol...

Long yupela ol gutpela *Wantok* rida i save wokim ol Sudoku kroswod pasel, dispela em nupela **SUDOKU**.

Long solvim Sudoku pasel, putim wanpela namba long wan wan bokis na olgeta ro olsem akros, daun, na olgeta liklik 9-pela bokis skwea long bikpela daigrem o bokis (i gat 9-pela olgeta) bai gat ol namba long 1 inap long 9. Wanpela namba i mas kamap wanpela taim tasol long wanpela ro. Wok wantaim ol namba olsem gaid o stia na wok long pinisim wan wan daigrem wantaim ol missing namba we bai mekim yu painim solusen. Tenkyu na gutpela pilai

STATIM PILAI

Lukluk long namba 9 kolom, bilong pasel piksa i stap long han kais. i gat ol sain insait long pasel bai i ken toksave long wanem hap insait long dispela kolom bai namba 3 i go.

Nambawan sain i stap long namba 8 kolom insait long piksa. I gat wanpela namba 3 insait long namba 5 bokis. Bai yumi i no i nap long putim wanpela namba 3 insait long wanpela 3 x 3 bokis eria, olsem na yumi bai i no i nap putim namba 3 insait long bokis namba foa, faiv o siks insait long namba 9 kolom.

Yumi ken rausim tu tripela bokis daunbilo tru long namba 9 kolom bikos i gat wanpela namba 3 insait long dispela 3 x 3 bokis eria tu. Olsem na dispela namba 3 i mas go long namba 2 o 3 bokis bilong namba 9 kolom.

Laspela sain nau i stap insait long namba 2 lain bilong piksa na em i gat wanpela namba 3 pinis long en. Loa bilong pilai i tambu long wanpela namba i kamap tupela taim insait long wanpela lain, olsem na i gat wanpela bokis tasol nau i stap long dispela namba 3 i go insait — em namba 3 bokis bilong namba 9 kolom.

Bihainim dispela stail na wanpela tingting na rausim i nap ol pasel bokis i pulap olgeta. Sapos yu laik save moa long insait bilong dispela pilai, yu ken go long webait long penny-dellpuzzles.com.

EXAMPLE

		7	9					1
2	3	8					6	7
		6		2	7			
7	8		5					
5	2		6		3			
				1		9	5	
			6	3		8		
8	4				9	2	1	
2						1	3	

EXAMPLE SOLUTION

8	4	7	9	6	3	5	2	1
1	2	3	8	4	5	6	7	9
5	9	6	1	2	7	4	8	3
9	7	8	3	5	4	1	6	2
4	5	1	2	9	6	7	3	8
6	3	2	7	1	8	9	5	4
7	1	9	6	3	2	8	4	5
3	8	4	5	7	9	2	1	6
2	6	5	4	8	1	3	9	7

Ansa bilong las wik SUDOKU 14

2	3	5	9	6	7	8	4	1
7	4	6	1	3	8	5	9	2
9	8	1	2	4	5	3	7	6
4	6	9	5	2	3	1	8	7
8	1	7	6	9	4	2	5	3
5	2	3	7	8	1	4	6	9
1	5	2	8	7	9	6	3	4
6	9	4	3	5	2	7	1	8
3	7	8	4	1	6	9	2	5

	6		5		2		7	4	
		4				6			
8	5	1	7						
		5		9			2	1	
6			2		4			3	
3	9			5		4			
						1	9	6	7
		9				1			
1	2		4		9		5		

Ansa bilong SUDOKU 15 long neks isu.

EMTV Television Guide

7:00 PM G **TOK PIKSA EP#37**
 7:30 PM G **PORTRAITS OF A NATION – TBA**
 8:00 PM G **60 MINUTES**
 9:00 PM MAO **MOVIE - Shutter (I)**
 11:30 PM G **HILLSONG Rpt...**
 12:00 AM G **EMTV NEWS – Replay**
followed by the Australia Network

1:00pm Grade 6 Mathematics
 1:50pm Grade 6 Science
 2:30pm DEPI Program
 3:30 PM G **KIDS KONA**
3:30 PM HI 5 – S7 EP#13/47
4:00PM BACKYARDIGANS EP#15/29
4:30PM DOGSTAR S1 EP#22/26
 5:00 PM G **KITCHEN WHIZ S4 EP#33**
 5:30 PM G **TOTALLY SPIES EP#23**
 5:57 PM G **CRIME STOPPERS**
 6:00 PM G **EMTV NATIONAL NEWS**
 7:00 PM PGR **GLEE YR.3 - EP#5/22**
 8:00 PM PGR **HOMELAND S2 –Ep5/12 “Q&A”**
 9:00 PM G **COCA-COLA SPORTS SCENE EP**
 9:30 PM G **EMTV NEWS REPLAY**
followed by the Australia Network

5:00 AM G **JOYCE MEYER - 1047-2**
 5:30 AM G **EMTV NEWS REPLAY**
 6:30 AM G **TODAY**
 09:00 AM **GENERAL VIEWING Classroom Broadcast**
 9:00am Grade 7 Mathematics
 9:50am Grade 7 Science
 10:40am Grade 8 Mathematics
 11:20am Grade 8 Science
 1:00pm Grade 6 Mathematics
 1:50pm Grade 6 Science
 2:30pm DEPI Program
 3:30 PM G **KIDS KONA**
3:30 PM HI 5 – S7 EP#14/47
4:00PM BACKYARDIGANS EP#15/29
4:30PM DOGSTAR EP#23/26
 5:00 PM G **KITCHEN WHIZ S4 Ep#34**
 5:30 PM G **DANI'S HOUSE YR2. EP#10/13**
 6:00 PM G **EMTV NATIONAL NEWS**
 7:00 PM G **HAUS & HOME Ep#35**

8:00 PM G **BUSINESS PNG – Ep#38**
 8:30 PM PGR **OFF THE MAP – Ep#3/13 “A”**
 9:30 PM G **EMTV NEWS REPLAY**
followed by the Australia Network
TRINDE OKTOBA 9, 2013
 4:57 AM G **AUSTRALIA NETWORK**
 5:00 AM G **JOYCE MEYER – 1047-3**
 5:30 AM G **EMTV NEWS REPLAY**
 6:00 AM G **TODAY**
 09:00 AM **GENERAL VIEWING Class-room Broadcast**
 9:00am Grade 7 Mathematics
 9:50am Grade 7 Science
 10:40am Grade 8 Mathematics
 11:20am Grade 8 Science
 1:00pm Grade 6 Mathematics

1:50pm Grade 6 Science
 2:30pm DEPI Program
 3:30 PM G **KIDS KONA**
 3:30 PM HI 5 – S7 Ep#15/47
 4:00PM BACKYARDIGANS EP#17/29
 4:30PM DOGSTAR EP#24/26
 5:00 PM G **KITCHEN WHIZ S4 Ep#36**
 5:57 PM G **TRICKY TV S3 – Ep#2/20**
CRIME STOPPERS
 6:00 PM G **EMTV NATIONAL NEWS**
 7:00 PM PGR **FACT FILES– Wiki Leaks**
 8:00 PM G **TOK PIKSA Ep#37– Repeat....**
 8:30 PM MA **ARROW Ep#14 “The Odyssey”**
 9:30 PM G **NEWS REPLAY**
followed by the Australia Network

MANDE OKTOBA 7, 2013

4:57 AM G **AUSTRALIA NETWORK**
 5:00 AM G **JOYCE MEYER – 1047-1**
 5:30 AM G **EMTV NEWS REPLAY**
TODAY
GENERAL VIEWING Classroom Broadcast
 9:00am Grade 7 Mathematics
 9:50am Grade 7 Science
 10:40am Grade 8 Mathematics
 11:20am Grade 8 Science

TUNDE OKTOBA 8, 2013

4:57 AM G **AUSTRALIA NETWORK**

Ol Progam na Kilok i ken tenis oltaim...

Wiken poto



Milnebe soim kala long Palamen



Ol wait meri traime danis Tolai



Edwill Sadu i gat 3 yia i mekim stail.

Raun wantaim Kanage olgeta wik

Toktok stret!

WANPELA taim Kanage i go raun long wara. Em i tingting long painim pis long wara ya nogat, ol 4-pela meri i wasim klos samting i stap. Nau Kanage lukluk tasol saitim long arere long tasol hait long bus na spai tasol i stap. Nau wanpela pisin bilong bus i singaut olsem ol man i wok long lap i stap. Na kanage i kirap nogut na em gi-aman katim ol liklik diwai nambaut na ol meri lukluk long bus, nogat Kanage i sanap sindaun long bus na spai i stap. Nau Kanage giaman tok olsem yupela ol 4-pela meri ya toktok wantaim mi, toktok stret noken lap nating.

**Gifflin Emolam
Menhi Snake Stone
Bulolo, Morobe Provins**

Ples Balus stap we?

KANAGE em bilong ples Binadere long Popondetta. Wanpela taim tupela meri blong em go raun long gaden na ol i kam bek. Taim tupela i kam long rot, meri bilong em kirap na tok, "Ayo plis mi gat wanpela buai tasol nogat daka ya, husat bai klaimim Kapiak diwai na kisim daka bilong mi?" Kanage tok "bai mi go nox bisi, em liklik samting." Em nau kanage i go antap long diwai na meri bilong em sanap long

as bilong diwai i stap. Kanage i go sanap long wanpela han bilong diwai na i wok long pikim daka. Em nau meri bilong em i tromoi ai i go antap na kirap nogut bikos trauses bilong Kanage i bruk na kamap olsem sket. Meri bilong em kirap na tok olsem, man dispela balus ya laik putim taiya bilong em long wanem hap na em kam, nogat ples balus ya. Kanage bekim tok bilong meri bilong em na tok, "em nau i gat wanpela save pes, ol i kolim olsem em ples balus ya, yu save o em ya, dispela ples balus i gat liklik kunai i stap long hap sait. "Olsem na em laik putim taiya bilong em long hap na em kam." Meri bilong Kanage kirap na tok olsem, "Sapos papagraun i tok orait em bai yu putim dispela taiya bilong yu, nogat em bai nogat olgeta. Maski yu klia." Na Kanage bekim tok "Awara Tasol!"

**Jane Mong
Koinambe, Mt. Hagen**

Stori bilong Denial i kam olsem

DANIEL em wanpela profet bilong taun Jerusalem. Wanpela taim em i sakim tok na brukim lo bilong king Dairus, long dipela as tasol ol i holim pasim Daniel na tromoi em i go daun long bikipela

hul bilong laion. Daniel i pundaun namel tru long ol grup laion tasol na man ol i kwik taim raunim Daniel na laik kaikai em liklik. Na turangu namel long ol laion wanpela tasol em lapun. Dispela lapun man laion i lukim olsem em i hangere nogut tru. Man taim em lukim olsem em bin tingim stori bilong Samson long bipo. Olsem na em i pret nogut tru na givim baksait na holim pasim ston na singaut isi, ol gutpela pikinini bilong mi noken tru go klostu long dispela man. Em i profet Samson ya man bilong brukim maus ya. Man taim ol harim olsem ol tu poret na surik isi isi i go longwe long Daniel na hait long ol bikipela ston. Profet Daniel i bin save long dispela taim, Long taim bilong profet Samson em hopim ai na wonim ol lion long noken bikheta gen.

**Samson Bira
Maprik East Sepik Provins**

**Ol skwat!
Salim ol gutpela Kanage
tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.
Txt: 72356149**

Mi gat wari na mi laik helpim

Dia Laipain,

MI GAT 18 krismas na mi wokim gret 11 long skul. Mi kam long wanpela gutpela famili. Mi namba tu long famili na mi gat 4-pela brata na susa.

Mi gat wanpela gelpren i stap long gret 12 long narapela skul. Famili bilong em i gat hevi we marit i bruk, tasol pasin bilong em i gutpela na em yet tu i wanpela kum katim meri. Mipela i bin stat long poroman taim mipela i stap long gret 6 yet. Ol papamama bilong mitupela i save long prensip bilong mipela na bikos long mitupela, ol tu i kamap gutpela pren.

Stat long dispela yia, gelpren ya i wok long abrusim mi. Taim mi ringim em, bai em i putim mi long voismeil o larim fon i ring i go tasol. Nau mi painimaut olsem em i senisim fon namba bilong em.

Mi wari tru nau ya. Mi no inap stadi gut bikos tingting bilong mi i no stap stret. Papamama bilong mi i lukim dispela na ol i wok long givim ol gutpela sapot toktok long mi tasol dispela i no helpim mi liklik.

**Plis Laipain, helpim mi!
BROKEN HEARTED**

Dia Pren,

Tenkyu long yu yet i laik kisim helpim long stretim dispela hevi na yu rait i kam long Laipain long kisim helpim.

Yu gat wari long prensip bilong yu wantaim meri bikos yutupela i bin save long yupela long taim yutupela i bin stap long gret 6 yet. Nau yu stap long gret 11. Gelpren bilong yu i no toktok long yu na i wok long abrusim yu, maski yu traime long toktok long em. Na em i senisim telepon namba bilong em tu.

Papamama i bin save long prensip bilong yutupela. Na bikos long dispela wari yu gat long en, tingting bilong yu i no stap moa long skul wok. Papamama i luksave long wari na ol i laik sapotim yu, tasol yu no amamas long sapot ol i givim.

Pren, mipela i save olsem yu no stap gut bikos yu no inap long lukim o toktok long lewa stret bilong yu. Tasol mipela i laik tok olsem wanem samting yu pilim na wari yu gat long em nau, em planti ol



yangpela i save bungim long laip bilong ol tu. Mipela i save kisim ol wankain pas olsem long planti ol yangpela long kantri.

Mipela i wok long tingting olsem wanem na ol tokstia we papamama i givim long yu. Planti papamama i laikim pikinini bilong ol na ol i laik bai pikinini i mas gat gutpela laip long bihain taim. I moabeta long yu painim taim long sindaun wantaim ol na harim ol stiatok bilong ol. Kain hevi we yu wok long bungim nau, em ol i save long en, na ol yet tu i mas bungim sampela kain hevi olsem bipo. Olsem na mipela i bilip planti yia ol i gat na ol ekspiriens long prensip na marit i ken helpim yu.

Pren, i gat planti as long pipel i mekim ol samting ol i mekim long en. I mas gat as we gelpren bilong yu i no laik toktok long yu. I moabeta long yu tu i painim taim long sindaun isi na glasim prensip bilong yutupela na tingting long rot we yutupela i ken toktok wantaim. Sapos em i skul yet, ating em i mas luksave olsem em i lusim bikipela taim long prensip bilong yutupela na em i no tingting tumas long mekim ol skul wok bilong em. Na dispela i stopim em long gol bilong em o wanem samting em i laik mekim long bihaintaim. Na yu yet pren i olsem wanem? Yu ting olsem wari tumas long gelpren bilong yu bai helpim yu inapim ol gol bilong yu long edukesen o nogat? Mipela i laik bai yu lukluk na tingting gut long dispela tripela hap toktok. Laik pasin, laik long slip wantaim narapela na strongpela sotpela taim laik pasin. Lukluk long mining bilong ol na skelim wantaim ol as tingting bilong yu long pren pasin wantaim gelpren bilong yu. Yu gat trupela laik pasin? Em i orait long gat gelpren tasol yu mas kontrolim lewa bilong yu na i no mekim ol samting i no stret taim yu stap olsem yangpela i stap yet long skul. Papamama bilong yu i tromoim

bikipela mani long skul bilong yu na mipela i bilip olsem ol i laikim yu long skul gut, pinisim gut skul na kisim wok. Olsem mipela i tok pinis, mipela i bilip olsem God i gat plen long taim na as long ol samting i kamap long laip bilong yumi. Na em i mekim i kamap bikos long gutpela bilong wan wan man. Long dispela taim yu no lukim gelpren bilong yu, em i gutpela taim long glasim na skelim ol as tingting na rot we yu wok long go long em taim yu na gelpren i wok long strongim prensip bilong yutupela.

God i laikim yu na i laik bai yu gat gutpela laip na mipela i bilip olsem wankain tu long ol papamama bilong yu. Mipela i enkarijim yu long bilip long God na em bai soim yu gutpela rot. Ritim buk bilong Proverbs 3:5&6. Na yu kisim sapot long ol papamama bilong yu o sios pasto o kaunseling ogenaisesen klostu long yu.

Plantu yu i no wokim gut na ol i drop aut long skul bikos ol i no mekim samting stret long skul gut. Na nau ol i no mekim wanpela gutpela samting we bai helpim ol long bihaintaim bilong ol, tasol ol i wokim ol bikheta pasin i stap long ol famili na komyniti bilong ol. Dispela em bikos ol i no laik harim gut stiatok bilong papamama na ol skul. Plantu i wok long kamap birua wantaim ol papamama na ol famili, lo na ol i go kalabus. Yu laik kamap olsem?

Pren, sapos yu laikim moa helpim, go long ol lain mipela i givim nem antap pinis, na tu, yu ken wokim apoinmen long kam lukim mipela taim yu gat taim.

Pren bilong yu Laipain

Sapos yu gat wari o hevi, rait i kam long dispela adres: Lifeline Counselling Services, P O box 6047, BOROKO, National Capital District, PNG. Yu ken ringim opis long telepon namba 3260011 o 3261680. O sapos yu stap long NCD, kam na lukim mipela long opis bilong mipela long Waigani. Mipela i no inap putim nem bilong yu long niuspepa, tasol mipela bai putim ol wari na hevi bilong yu.
Laipain

TISA tok nogat long BSP kisim Credit Corp

Stanley Nondol i raitim

TISA Sevings na Lon So-saiti i tokaut olsem Benk Saut Pasifik bai no inap baim Credit Corporation maski Credit Corp Bod i tok orait long ofa bilong BSP.

Tisa em namba tri bikpela seaolda wantaim 15.3 pesen na bihain long Nasfan wantaim 18.7pesen na Nambawan supa long 15.8 pesen.

TISA bod siaman Gabriel Tai i tok TISA i egensim plen bilong salim fainensing na lisen han bilong Credit Corp na em i tok dispela dil em i no gutpela long ol seaolda.

BSP i mekim ofa long K250 milien na Credit Corp i wanbel long salim tasol TISA em i namba tri bikpela seaolda long dispela Credit Corp na i egensim na singaut long olgeta seaolda long sapotim tingting bilong TISA

long BSP i no ken baim.

Mista Tai i tok TIS i no sapotim bikos long ol dispela as;

- Ol bod na menesmen bilong Credit Corp i no mekim gut wok long bisnis na ol i no daunim planti salens long bisnis na dispela soim olsem ol i slek long ranim bisnis bilong seaolda bilong Credit Corp

- No gat wanpela wok sekim kamap long ran bilong

Credit Corp long planti yia na ol seaolda i no klia long bihain bilong CREDIT Corp.

- Independen ripot bilong Credit Corp Fainens Limited i no lukluk long planti samting na em i lukluk long velu bilong kampani na long hamas BSP bai baim dispela bisnis.

Mista Tai wantaim ol memba bilong TISA i tok ol i no wanbel long dispela independen ripot bilong salim long BSP na tok ol seaolda i

no kisim tok klia na i no save long rot bihain Credit Corp bai ran. Dispela i mekim ol i tingting planti na TISA tok nogat long salim long BSP.

Sif Fainens Opisa bilong Tisa, Mathew Hasu i tok balens sit long las 5 pela i soim olsem i gat bikpela san long kampani i ken gro maski kampani i no mekim winmani long 2009 na kam antap bilong wanem prais bilong ol komoditi long wol maket i

pundaun.

Mista Haus i tok sapos bod na menesmen i laik salim Credit Corp, ol mas salim brens long Fiji, Solomon Ailan, Vanuatu na i no ken salim mama kampani long PNG.

Mista Haus i tok PNG ikononi i wok long gro na Credit Corp i gat bikpela sans long gro na givim sevis long ol pipel na mekim winmani bilong ol seaolda.

Taiwan laik helpim ol SME bisnis

TAIWAN i laik Papua Niugini gavman i wok klostu wantaim em long kisim skul na lainim ol rot bilong helpim PNG long groim ol smol tu medium enteprais (SME) bisnis na salim go aut long wol maket.

Man i makim Taiwan long PNG, Daneil Hu i tok em i gat bikpela bilip long PNG i groim SME long strongim ikononi. Na em i laik PNG i wok bung wantaim Taiwan husat gat moa long 2.5 milien SME bisnis.

Mista Hu i mekim dispela toktok long taim bilong wanpela bikpela Tred Delegates bilong Taiwan i stap long kantri long soim ol kain kain prokad bilong Taiwan long PNG. Bai ol i toktok wantaim PNG bisnis long painim rot bilong mekim bisnis na bikpela lukluk bilong ol em long wok SME long kantri.

Ol 20 bisnis kam raun long kantri na holim Tred Fe long Pot Mosbi long 7 na 8 Oktoba na bai ol i go soim long Lae long Oktoba 9 na 10.

Mista Hu i tok em i gat bikpela bilip long PNG gavman i sapotim SEM. Em tok Taiwan em pulap long SME na ol pipel long hap save wok strong long SME long groim ikononi bilong kantri.

Taiwan i gat nem long mekim ol kain kain prodak olsem ilektronik, bebi prodak, komputa, solar, bebi prodak, CCTV, rais miling masin, pats bilong kar, pis prodak na pis bot na ol planti moa kwaliti prodak bilong Taiwan.

Mista Hu i tok PNG gavman i mas kamapim ol mama kampani long lukautim ol SME long kain kain eria bilong bisnis na salim ol prodak bilong SME go ovasis long pulim moa mani kam insait na groim ikononi bilong kantri.

Mista Hu i tok Taiwan i save salim planti SME pro-

dak go aut long ovisis na lukim bikpela winmani. Em tok emi amamas long PNG gavman i toktok long groim SME. Em i tok gavman bilong Taiwan i redi long wok bung wantaim PNG long SME bisnis.

Dispela 20 bisnis i soim kain kain prodak na planti bisnis long PNG i go bing long Crown Plaza Hotel na toktok wantaim ol bisnis haus bilong Taiwan.

Seketeri bilong Tred Komes na Industri John Andrias, Ekting praim minista Leo Dion na Minista bilong Leba na Industri, Mark Maipakai i kamap long dispela bung na tokaut long sapot bilong gavman long Taiwan. Na ol it ok ol i laik lukim ol SME i gro long developim ikononi bilong PNG.

Mista Dion i tok olsem 10 pesen bilong SME long kantri em bilong ol PNG. Em i tok PNG no gat gutpela infrastraksa olsem gutpela rot, bris, pawa saplai, na trenspot na dispela i givim hatwok long ol manmeri long distrik na ples i kamapim ol liklik bisnis.

Mista Dion i tok ol benk na fainens kampani i sasim bikpela fi na mekim ol liklik manmeri i painim taim long kisim dinau long sapotim ol yet long wok bisnis.

Em tok gavman i luksave pinis long dispela na SME nau bai kisim bikpela luksave na gavman bai sapotim ol pipel long kantri long wok bisnis.

Mista Dion i tok gavman i putim bikpela milien kina long ol rot, bris na ol infrastraksa projek wantaim bikpela milien kina long Nesenel Developmen Benk long sapotim ol SME bisnis long kantri.

Ekting praim minista i givim bikpela tok amamas long Taiwan Tred Delegates i kam lukluk raun long kantri.



Westpac brens menesa and instua benking opisa wantaim hetman bilong ritel benking, Adam Downier (R) na man go pas long woksop, Clare Balderston bilong Westpac Sidni bihain long woksop las wik

Westpac i givim fri fainens woksop

WESTPACi go het long givim fri fainens infomesen long planti tausen manmeri long kantri stat long 2010.

Westpac i bung wantaim Pasifik Fainensel Inklusen Progrem (PFIP), na i kirapim trening program long sapotim na developim brens menesa long woksop long ol bai givim save long ol komyuniti long kantri.

Long dispela program Westpac i laikim 4,800 pipel i mas kisim fri fainensel woksop insait long tripela mun.

Las wik, 16 brens menesa, wantaim 5-pela instua benking wokman na 4-pela greduet

treni i bin stap insait long wan wik woksop long Pot Mosbi. Wanpela wokman bilong Westpac Sydney, Australia, i givim fri fainensel woksop long apim save bilong ol.

Ol brens menesa bai skrujm dispela save ol i kisim long woksop i go long komyuniti long hap ol stap na wok long en.

Hetman bilong ritel benking bilong Westpac PNG Adam Downie, i amamas long ol brens menesa i kisim moa trening na i tok dispela save bai go long ol manmeri long provins long kantri long ol bai save gut long rot bilong mani

benking na bisnis.

Mista Downie i tok ol skul, sios grup, na ol wokman long provins i ken toktok wantaim ol brens menesa long em i kem makim taim long kamapim wankain woksop long givim moa skul tok long ol pipel long gutpela rot bilong mekim benking na bisnsi na ol arapela save bilong fainens.

Mista Downie i tok bikpela populesen o 85 pesen bilong PNG populesen i no yusim benking sevis na i tok Westpac instua benking em gutpela rot we Westpac i helpim ol pipel long mekim benking

isi. Mista

Downie i tok 85 pesen husat i no save long yusim benking savis i nas gat sans long kisim fainens save long ol brens menesa.

Em i tok Westpac klostu bai lonsim mobail benking long mekim benking i moa isi long ol kastoma na ol lain husat i no save long yusim benking sevis.

Mista Downie tu i tok ol liklik bisnis tu mas save long rot bilong mekim winmani na tok dispela woksop bilong brens menesa bai tok klia long ol pipel bai save long lukautim mani na mekim winmani.

BPNG go lukluk raun long Lae Tidal Basin projek

BOD bilong Sentrek I Benk go lukluk raun long Lae Tidal Basil Developmen Projek bihain long ol i pinisim kwetali miting long Lae Morobe provins long las mun.

Ol sinia ekseksetiv memba bilong benk na gavna Loi Bakani i go lukluk RAUN long dispela projek na kisim klia infomesen

na klia long wanem samting Kamap long dispela projek we i gat bikpela kaikai bilong em long ikononi bilong kantri.

Siamen bilong bod na gavna bilong benk Loi Bakani i tok benk i save long gutpela samting dispela projek bai pulim kam long kirapim wok developmen na

ikononi bilong kantri.

Mista Bakani taim lukluk long projek i tok em i klia long wanem samting bai kamap long wok diveopmen long surukim projek go het long ol pipel bai kisim sevis.

Mista Bakani i tok bikpela amamas long kamapni go pas long dispela projek na i

tok projek i kamapim planti wok na em moa gutpela long developim Lae na PNG.

Mista Bakani tok bikpela amamas long PNG Ports long go pas na stretim ol sip bris long kantri.

Ol wokman bilong Tidal Basin projek na PNG Ports longLae i bungim BPNG staf long dispela raun long Lae

Maritaim trenspot divisen kisim skul long ol Japan

Dipatmen bilong Trenspot i sainim ol ripot bilong toktok bilong seketeri wantaim JICA, Japan Intenesenel Kopresen Ejensi, long skulim ol wok lain bilong maritaim divisen long kain kain wok bilong Pot Menesmen.

Dipatmen Seketeri, Roy Mumu i sainim dispela ripot wantaim Shigeru Sugiyama, Hetman bilong JICA long kantri. Dispela i soim tok orait bilong gavman bilong Japan i wanbel wantaim gavman bilong PNG 2013 i go inap 2016.

Mista Mumu i tok Dipatmen bilong Trenspot em i papa bilong trenspot sekta olsem na em i wok bilong dipatmen long redim polisi bilong dispela sekta na long kirapim institusenenel infrastraksa invesmen. Em i bihainim strateji aninit long PNG visen 2050 we i toktok long skulim ol Papua Niugini yet long kamap saveman na meri insait long wan wan wok na mekim gut olgeta wok bilong ol.

Nesenel Trenspot Strateji em ol i bin lonsim long Julai 2013, i tok klia long polisi stetmen bilong maritaim trenspot na kepesiti bilding long gavman na praivet sekta wantaim Polisi daireksen bilong maritaim

trenspot i karamapim ol pots na wok bilong ol pots, riva trenspot na riva pots na lending, kostal maritaim ektiviti, marin nevigesen infrastraksa na operesen, intenesenel na kostal siping.

Nau dispela strateji i nidim ol saveman long ronim wantaim ol spesel save bilong mekim samting. Nau dispela agrimen bai stat long Jenueri 2014 taim gavman bilong Japan bai stat long putim eplikesen long ol saveman long Japan bai aplai long ol kain kain wok bilong skulim ol PNG maritaim wokman na meri.

Bihain long tripela yia, ol PNG yet bai tekova long olgeta wok bilong maritaim divisen bilong Trenspot Dipatmen.

Nau yet i gat ol kain kain hevi i save kamap, na tu ol wok bilong pots na haba i no ron gut tumas bilong wanem ol wokman i no gat gutpela skul na save. Ol kain hevi olsem sip i go daun long solwara o ol lain i lus long si, em i wok bilong dispel sekta.

Man i makim JICA, Shigeru Sugiyama i tok, "Mipela i amamas tru long stap hia tude bilong wanem em i lukim stat bilong nupela samting."




Seketeri bilong Dipatmen bilong Trenspot, Roy Mumu i sainim rekot bilong ol miting wantaim Shigeru Sugiyama husat i makim JICA long PNG.

JICA nau i gat ol narapela K4.7 milen projek long kepesiti bilding wantaim Dipatmen ov Woks, Maritaim Trenspot long givim trening long ol wok lain bilong Dipatmen bilong Trenspot long mekim wok bilong pot polisi na edministresen insait long 15 nambis provins.

Narapela moa projek ol i gat

wantaim Plent na Trenspot Divisen, Dipatmen ov Woks long mak bilong K21.6 milen insait long Morobe, Sepik, Westen Hailens na Wes Nu Briten long bringim ol masin olsem buldosa, ekskeveta, dam trak na ol narapela bilong wokim na stretim ol rot. JICA bai bringim ol dispela masin long Februeri 2014 samting.

Las projek wantaim plent na trenspot long Dipatmen ov Woks wankain olsem pastaim em K9.4 milien wok bilong kamapim gut save bilong wok long Dipatmen bilong Woks long skulim ol wokman long yusim ol masin i kam aninit long helpim bilong JICA yet.



Papua New Guinea
DEPARTMENT OF FINANCE

NOTIS IGO LONG OL SAPLAIA BLONG OL GUDS NA SEVES IGO LONG GAVMAN DIPATMENT, PROVINCOL NA LOKOL LEVEL GAVMAN

2013 PASIM BLONG OL AKAUNTS

TOKSAVE LONG ARERE BILONG 2013 FAINENSOL YIA LONG PABLIK OLSEM:

- Laspela dei long givim auto I niupla Integrated Local Purchase Order Claim (ILPOCS), na tok orait long komitmen igo long Gavman PGAS em long deit 14th DISEMBA 2013. Bai inogat niupela ILPOC bai go aut bihain lo displa dei, 14th DESEMBA 2013.
- Peimen bilong guds na seves igo long husat I givim ol samting long Gavman, yusim ol trupla ILPOC bai igo yet inap 31st DISEMBA 2013.
- Gavman bai baim husat saplaia sapos yu givim ol invoices blong yu igo inap arere blong bisnis long dei 13th DISEMBA 2013. Sapos yu givim ol guds na seves pastaim long 13th DISEMBA 2013, yu bai ol baim yu long 2013 yia.
- Olgeta invoices na wanem kain askim yu gat imas go long pei opis blong wanem Gavman dipatmen husat ibin usim guds na seves blong yu. Noken karim ol kleims bilong yu igo long dipatmen bilong Fainens.
- Toksave ken olsem Gavman bai baim tasol ol opisol ILPOC na APC na ino ol narapela kain kleim. Dispela emi Lo.

AUTHORISED BY
DR KEN NGANGAN CMA CPA
ACTING SECRETARY

Bilum bisnis bai go long wol maket

Stanley Nondol i raitim

OL BILUM bilong PNG i kisim ai bilong autsait kantri na gutpela nius nau i go long ol meri bilong kantri olsem bilum bilong ol bai go long wol maket long gutpela prais bihain long tripela yia.

Intenesenel Tred Senta (ICT) wantaim Smol Bisnis Dvelopmen Kopresen (SBDC) i statim pinis toktok long kamap wantaim gutpela rot na opim rot long wol maket long ol gutpela bilum bilong PNG ken go long maket long narapela kantri.

ITC Tim Senia Tred promot, Govind Venuprasad wantaim ol tim memba i kam lukluk raun long kantri las wik long bilum maket long Goroka, Mt Hagen na Mosbi na toktok wantaim SBDC long painim gutpela rot long helpim ol PNG meri long salim bilum long wol maket.

ITC Tim i stap long Jenva long Swiselan. Ol i tok PNG meri i mekim kain kain kala na stail bilum long han tasol ol i no gat ol maket long salim dispela bilum.

ITC tim na SBDC i



PNG meri i wokim kain kain stail bilum na bilum dres i kisim ai bilong turis na gavman bai givim bikpela luksave.

toktok pinis na tokaut olsem tupela bai wok bung long tripela yia stat long 2013 na long 2016 dua bilong wol maket bai op long ol PNG meri i salim bilum long ol kantri long wol na mekim gutpela mani.

Save bilong ol PNG meri long wokim bilum i go antap moa na nau ol i save wokim dres tu na putim long ol bikpela de.

Dispela em wanpela rot we gavman bai sapotim ol meri long SME bisnis.

Taim ITC na SBDC i stretim olgeta rot insait long tripela yia bai lukim ol meri bai gat sans long kisim sapot bilong gavman long Wimen in Bisnis na ol arapela rot bilong sapotim SME bisnis.

ITC i tok PNG em i wanpela kantri tasol long wol i wokim bilum bihainim tumbuna pasin o pasin kalsa tasol no gat gutpela maket. Ol save salim tasol na wet longpela taim long ol kastoma.

Ol pipel bilong Raikos i kisim fama na bisnis trening

OL FAMA long ples Erima ausait long Madang Taun i kisim skul long go insait long ol liklik bisnis olsem poltri o lukautim na long salim ol kakaruk, fam menesmen na maketing wantaim helpim bilong Ramu NiCO Menesmen (MCC) Limitet.

Ramu NiCO Egrikalsa seksen aninit long Komyuniti Afeas Dipatmen i bin holim tupela de trening long Erima Praimeri skul long Rai Kos Distrik long Septemba 25 na

26, na i bin lukim 34 ples lain na ol fama i sindaun long kisim skul long en.

Ol lain i bin kisim skul trening long fam baset, menesmen na plening, menesmen modol, wok bilong menesmen, lukautim kakaruk, maketing na ol narapela moa.

Allan Wahwah em Supavaisa bilong Ramu NiCO Egrikalsa seksen na wanpela trena long tupela de trening kos i tok ol lain i sindaun long woksop i bin ama-

mas long program na soim planti intres.

"Mipela i skulim ol long go insait long ol liklik bisnis, mekim mani, sevap na mekim gut long laip. Ramu NiCO i wok long mekim ol trening long ol impek eria," Mista Wahwah i tok.

Em i tok dispela awenes program na trening em inapim ol tingting bilong gavman long Visen 2050 long kamapim welt o ol gutpela samting long go hetim kantri.

Long las de bilong woksop, ol woklain bilong Pipels Maikro Benk i bin mekim awenes bilong nupela benk long ol samting olsem rot long opim akaun, seavings na lons na ol arapela prodak bilong dispela benk.

Moa long 30 pipel i bin opim ol nupela akaun wantaim benk ya we i opim nupela han bilong em long Madang Provins.

Benk ya i no sasim fi long holim akaun o long putim na rausim mani.

China bai gat bikpela invesmen moa long PNG - Qiu

PNG em namba tu bikpela treding patna na ples we bikpela investmen bilong China stap long en long Pasifik Ailan rijon.

Embeseda bilong China long PNG, Qiu Bohua I tokaut long dispela las wik long makim 64 Anivesasi bilong Kamap bilong Pipols Ripablik ov China.

Embseda Qiu I tokaut tu olsem bailateral tred I sanap olsem US\$ 1.3 bilien na total invesmen bilong China long PNG em moa long US\$ 2 bilien.

Mista Qiu I tok olsem dispela US\$ 1.8 bilien Ramu Nikel Projek long Madang provins em bikpela invesmen projek bilong China long Pasifik Ailan rijon. Projek ya i bin go insait long operesen long mun Disemba las yia na I kamapim moa wok long ol lokal lain insait long komyuniti.

Embeseda Qiu I tokaut olsem Sinopec em wanpela bikpela petroleum koporesen bilong China husat bai baim ol PNG LNG projek. Narapela samting tu em China Ovasis Enjinia Grup (COVEC) na China Haba Enjiniering Kampani I wok hat tru long Hailans Haiwe projek na tu wok long wokim kamap nupela sip bris long Lae pot.

Em I tok tu olsem planti ol arapela kampani bilong China na ol liklik bisnis I wok long sait long konstraksen bilong ol projek long PNG long helpim ol grasruts o liklik

manmeri.

Mista Qiu I tok China I givim tu helpim long sait long eid I kam long PNG. Em I wokim dispela long sait long ol projek em I kamapim olsem spots stedium, ol trening senta, skul na rot long kantri.

China I salim 6-pela medikol tim bilong en long wok long Mosbi Jeneral Hausik na China I givim tu moa long 200 skolasip long ol sumatin bilong PNG long go stadi o skul long China na tu I givim moa sans long moa long 500 lain long go kisim trening long China. Dispela I bin kamap long las yia na tu dispela yia.

Embeseda Qiu I tokaut klia olsem ol soft lon o dinau China I givim I helpim long krapim domitori o ples-slip bilong ol sumatin-meri long Yunivesiti ov Goroka (UOG). Wankain helpim tu I bin go long kamapim Intagreted Gavman Infomesen Network (IGIS) blong PNG gavman na tu Distens Network bilong Komyuniti Koles we I gohet gut I stap.

Mista Qiu I tokaut tu olsem China bai wokim kamap wantaim bikpela Intanesenel Konvensen Senta, na dispela em bai bikpela eid projek tru bilong China long Saut Pasifik rijon.

"Mipela I bilip ol dispela helpim blong China I ken strongim ekonomik na sosel developmen long PNG," Embeseda Qiu I tok.



LAIK OPIM AKAUN: Ol lain i bin sindaun long fama na liklik bisnis woksop na trening i laik opim ol akaun wantaim Pipels Maikro Benk, Madang Brens. *Poto: Mathew Yakai*



NAMBA WAN LONG OPIM AKAUN: Denmar Lovovor em i namba wan man long opim akaun. *Poto: Mathew Yakai*



Bikpela intanesenel Basamuk Pot wantaim Ramu Nikel Projek em bikpela invesmen blong China long PNG

PHILIPPINES 6 DAYS A WEEK!

Whether for business or leisure, Air Niugini now offers you even more choices for travel to and from Manila or Cebu. **Air Niugini - making your travel more convenient.**

OUR SCHEDULE

Port Moresby to Manila Return:
Tuesday/Wednesday/Friday/Sunday

Port Moresby to Cebu Return:
Monday/Thursday

Call toll free on **180 3444** or visit **www.airniugini.com.pg** and contact your nearest Air Niugini Travel Centre or Travel Agent for further details.



Air Niugini 40 YEARS



David wara-man kontrolim das bihainim OEMP

S APOS yu wanpela nupela man o meri long go raun lukim ol eria long Kurumbuari (KBK) Main na Basamuk Rifaineri bilong Ramu NiCo Menesmen (MCC) Ltd long Madang, bai yu lukim ol bikpela wara kar i tromoi wara long graun na muv i go kam i stap.

Dispela ol wara kar i mekim bikpela wok tru bihain kondisen o permit Gavman i givim long Ramu Projek aninit long Operesinol Envairomen Menesmen Plen (OEMP). Na kontrolim das long ol rot em wanpela long ol sab-plen insait long OEMP, we Dipatmen ov Envairomen na Konsevesen (DEC) i laikim i mas kamap oltaim bihainim pemit o tok-orait Gavman i givim long divelopa bilong Projek, Ramu NiCo long bihainim.

Ating planti lain long Basamuk i save pinis long wanpela stail 'Bai' bilong Karkar ailan nem bilong em David Gelagal, husat i save draivim wara-kar na raun tromoi wara long rot long Basamuk. Wok David wantaim ol arapela wanwok bilong em long KBK Main i wokim em bikpela wok tru, tasol ating i no save tumas long dispela bikpela wok aninit long OEMP.

OEMP i gat 20 sab-plen we i stap we Projek divelopa, Ramu NiCo insait long Helt, Sefti na Envairomen Dipatmen bilong en i wok long karimaut ol wok we i mas bihainim pemit kondisen bilong DEC. Dispela em bikos taim das i go aut em i ken kamapim hevi na sik long helt bilong ol pipel insait long Projek eria, na dispela em DEC i no laikim aninit long kondisen.

Maski olsem dispela bai ting dispela 'bai' David Gelagal i mekim wok nating, tasol bagaros ya pastaim i wok olsem nevi long PNG Difens Fos i mekim bikpela wok stret. Na wok bilong em wankain olsem ol arapela wokman meri long Ramu Projek i karim gut nem bilong kampani long ai na luksave bilong DEC na Gavman bilong PNG.

Basamuk Rifaineri bilong Ramu NiCo long Raikos i gat planti dipatmen na ol seksen we i gat wan wan wok bilong ol yet. Na ol nesanel wokman bilong PNG i wok wantaim ol wan-wok bilong China i stap. Ol lain ya i mekim planti gutpela wok bilong kampani, tasol planti i no luksave long wok bilong ol tumas, tasol em bikpela wok long sait long operesen bilong Projek. Maski.

David Gelagal em wanpela stail 'Bai' bilong mekim fani na tok-pilai wantaim ol wanwok bilong em, tasol wok bilong em i smat moa. Wankain pasin tu i stap long planti ol nesanel wokman bilong Ramu NiCo long Basamuk Rifaineri. Ol lain bilong wok hat stret long wan wan seksen bilong ol. Tasol long taim bilong malolo ol bai stori na

mekim fani gut na tok-pilai i go kam.

Gelagal i wok aninit long Mobail Mentenens Seksen long BSK, na long dispela seksen i gat planti ol nesanel wokman husat i save wok hat tru. Ol dispela lain i save wok long woksop long sait long fiksime o stretim ol kar na masin bilong kampani. i gat ol draiva bilong ol bikpela Yutong bas tu i kam aninit long dispela seksen. Long wok bilong maining i save lukim planti ol wokman i lusim ples na go stap long wok longwe long femili, olsem na pasin bilong stap bung-wantaim na serim tingting long wok na stap olsem 'pasin barata' em bikpela long Basamuk Rifaineri na tu long KBK Main.



1. David Gelagal arere long wara trak.
2. Wara trak wasim rot long KBK.
3. Kar wetim simen rot long BSK Rifaineri rot.
4. David wantaim ol wanwok long BSK.

Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisanim o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 miliar kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil biding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

Wanpela Ramu NiCo, Wanpela Komuniti



Moa fama laikim klon kakao bilong CCI

James G. Kila i raitim

PLANTI fama long Madang i soim bikpela laik tru long groim ol klon kakao, na ol i wok long baim long kakao neseri bilong PNG Kakao Kokonas Institut (PNGCCI) long Murunas.

Wanpela saveman long egrikalsa, Aldam Bande, i bin helpim na bringim sampela lain fama i go long neseri bilong CCI long Murunas we ol i baim ol klon kakao long neseri.

Ol wokman bilong CCI i helpim ol gut long lodim kar na karim i go planim long blok bilong ol.

Wanpela long ol dispela fama em Jeffrey Vingu, husat i save stap long Erima. Bagaros ya i tok em i amamas tru olsem Mista Bande i redim rot bilong em long go kisim ol klon long Murunas.

"Mi digim graun long blok pinis na wetim ol sidling, na dispela sans long kisim ol sidling long Murunas bai helpim mi gut," Jeffrey i tok.

Laik bilong Jeffrey i kamap bihain long wanpela fil de i bin kamap long Erima skul. Ol bikpela saveman bilong CCI olsem ol saintis na ol egrikalsa saveman i go toktok na lukluk raun long ol kakao demo blok bilong ol model fama.

Jeffrey i tok fil de ya i gutpela sans tu long ol fama long lukluk na kisim gutpela tok save na lainim ol nupela samting long strongim wok bilong

kakao na kokonas long kantri.

Het tok bilong dispela fil de em "IPDM em Rot bilong Strongim Wok bilong Daunim Sik na Binatang na Apim Prodaksen na Kwaliti bilong Kakao na Kokonas"

IPDM em intagreted pest na disis menesmen. Em i lukluk long daunim ol sik na binatang nogut i save daunim o bagarapim kakao na kokonas.

CCI Madang Program menesa bilong Ekstensen na Trening, Vincent Sale i tok ol ogenaisa bilong fil de i putim kamap dispela fil de long Erima bikos i gat planti ol gutpela model fama i stap long dispela ol eria bilong Raikos.

Mista Bande i tok bikos long planti sik bilong kakao olsem kakao pod bora (CPB) i bagarapim planti ol kakao ol CCI i wok strong long kamapim ol kakao we i no inap long kisim sik nogut ya na i kamapim ol klon.

Em i tok tu olsem ol klon kakao sid ol fama i ken planim na bihain long 10-pela mun tasol bai ol i lukim ol kakao i putim plaua.

Em i tok tu olsem em wok bilong ol fama long lukautim na stretim kakao bilong ol oltaim bihain long ol i karim sampela taim. Dispela bai strongim ol long gro gut gen na putim moa kaikai long diwai. Taim ol fama i mekim olsem ol bai kisim gut mani na helpim sindaun bilong ol wantaim famili long ples.



Mista Bande, Jeffrey na Lloyd wasman long CCI neseri long Murunas. Poto: James G. Kila

Dolly

Em bai mekim yu laikim **sampela moa!**



PROUDLY **PNG MADE**

RD TUNA CANNERS LTD.

Karate kirap gen



TAIM mi liklik, mi save harim nem bilong planti ol paitman bilong yumi long masol ats.

Dispela ol man i bin mekim gut long wanwan ol masol ats stail bilong ol na i save go makim Papua Niugini long planti ol arapela intanesenel tonamen long wol.

Sampela long dispela ol stail em Kung Fu, Taekwando, Kickboksing na Karate.

Ol paitman husat nem bilong ol i save pairap em Stanley Nandex, Gabi Yura Leana, Jamuga Stone, Edward Kassman, Walter Schnaubelt, Bernard Soari na ol arapela.

Tasol inap long tri o 4-pela yia i go pinis, nogat wanpela nem bilong dispela ol spot o nem bilong ol pilaia bilong ol i save kamap bikpela o ples klia.

Wanwan olsem Taekwando na Kikboksing i mekim nois yet wantaim ol pilaia bilong ol olsem Theresa Tona, Lee Garap na Laurie Hanku.

Tasol wanpela masol ats spot we i bin stap hait tru long dispela liklik taim, i bin Karate.

Ol klap i stap na ol paitman i stap trening tasol i nogat planti bikpela tonamen tumas i kamap.

Inap long 2011, Karate i stat long pairap gen.

Bipo ol i save gat ful kontek stail bilong pilai we ol paitman i no save werim karamap long han lek na bodi bilong ol taim ol i pait.

Tasol nau, ol i go insait long narapela stail bilong pilai we ol i kolim poin kumite na kata.

Long poin kumite, ol paitman i save werim karamap long han, lek, bodi na het na i save pait long kisim poin.

Astingting bilong pait em long lukim spit na save bilong ol long pait na ol i nosave tromol han na lek strong tumas olsem long ful kontek.

Long kata, ol i save soim tasol wok-abaut na pait stail bilong Karate we ol i save lainim long wanwan klap o skul bilong ol.

Husat i mekim gut i save kisim moa poin na win.

Ful kontek stail bilong pilai stap yet tasol em i no save kamap insait long ol bikpela gem olsem Pasifik Gems, Komonwelt na Olimpik Gems.

Astingting bilong PNG Karatedo Federation nau em long kamapim planti moa tonamen bai ol paitmanmeri ken i gat sans long soim na traim save na strong bilong ol.

"Spot bilong yumi em i no olsem ol arapela spot olsem ragbi na soka we ol i save pilai olgeta wiken, long dispela as yumi mas i gat ol tonamen i kamap olgeta taim bai ol pilaia bilong yumi ken gat sans long resis na soim save na strong bilong ol," Presiden bilong PNGKF, Carl Mari tok.

Em i bin mekim dispela toktok taim em i opim namba wan Papuan Open Karate taitol las wik Sarere long Salvation Army opis long Mosbi.

Long wankain tam Mari tokaut olsem Australasian Karate taitol bai kamap long Mosbi long Disemba dispela yia dispela tonamen i gutpela long redim ol paitman bilong en.

Dispela Australasian taitol em i intanesenel tonamen we bai lukim ol tim bilong wanwan klap long Australia, Nu Silan, Pasifik na Esia tu i kamap long pilai wantaim ol klap bilong PNG.

Laspela taim wanpela intanesenel tonamen bilong Karate i kamap long PNG i

bin longpela taim i go pinis na Mari amamas long dispela sans long kisim i kam bek gen.

Nau yet, planti moa manmeri save long Karate olsem wanpela masol at tasol dispela kain ol tonamen i ken soim ol olsem em i wanpela spot tu.

Dispela namba wan Papuan Open Karate taitols bilong 2013 i bin kam aninit long was bilong NCD Karate Asosiesen na long 2014 bai Sentrol Karate Asosiesen i go pas long en.

Planti ol biknem paitman husat mi kolim nem bilong ol pinis i go bikpela manmeri nau na ol i no pait moa tasol mi bilip ol bai amamas long lukim na harim olsem wanpela strongpela stail bilong masol ats we ol i save pait long en bipo i wok long kamap strong gen.

Na sapos yu wanpela paitman husat i no bin trening strong tumas long las tupelo yia bilong wanem yu ting olsem yu westim taim long trening na i nogat gem o pilai bilong yu, ating yu mas kirap gen nau.

Rausim das long yunifom bilong yu, pasim belt bilong yu gen na go bek long trening.



SALUT: Ol paitman meri sanap na singsing nesene entem bilong PNG bipo long ol pilai stat long namba wan Papuan Open taitol las wik long Mosbi.



AMAMAS: Ol pilaia bilong wanpela klap i bung wantaim na soim ol medol ol i winim las wik.



SOIM SAVE: Wanpela meri wokim stail bilong em insait long "Kata" kompetisen.



KIBUNG: Carl Mari (sindaun long namel) i bung na toktok wantaim ol karate pilaia husat i stap long developmen skwat.

Oi spot eksen poto long wiken...

Oi Poto Nicky Bernard.

Oi Kwinslen Indijines skul bois ragbi tim i kam pilai long Mosbi long wiken.

Gol kipa bilong Hard Rock i rausim bal long lek.


Fowod bilong Hawks i traim banis bilong Dobo Warriors long semi fainol pilai bilong ol long Mosbi ragbi resis.

BUNGIM IRO: Darius Holdam i flai long Lihir i kam long lukim iro bilong Sam Thaiday taim ol kam pilai long Kokopo.

Tupela tim mate i bung long Kokopo long PM 13. Bai tupela i bung gen long wol kap long pinis bilong dispela mun.

TOKSAVE: Salim ol spots dro bilong yu kam long Feks; 325 2579, e-mel;bveo@wantok.com.pg o kam lusim long Wantok Niuspepa opis long Able Building Complex long Central Waigani, NCD.

Sonny Bill Williams



Em i gutbai nau?...

Gem bilong Sande win long gren fainal i luk olsem i las gem bilong Sonny Bill Williams long Ragbi Lig.

Primiasip win bilong Sonny Bill Williams wantaim Roosters i muvim em i go liklik long pilai ragbi yunien wantaim ol Nu Silan tim.

Williams i pasim em yet long pablik na ol midia bipo long gren fainal na win

long 26-18 egens Manly i tok, mi hop long mekim fainal disisen bilong mi long stap bek o pilai ragbi yunien wantaim Nu Silan long tupela wik bihain.

Nau mi malolo pastaim.

Em i tok, Wol Kap Win bilong All Blacks i bin putim wanpela bikpela ofa i go long Super Rugby Chiefs, na tu ofa long milien dola long boxing bilong heviweit taital long Nu Silan.



Wanem disisen nau!

Kosa bilong All Blacks nau i tok olsem Sonny Bill Williams i nogat nem long Nu Silan long pilai long Wol Kap resis...Em i stap long han bilong em long kamapim wanem disisen bilong em long tripela wik taim....

2013 MOROBE SHOW

"SUPER SPECIAL DEAL"

Buy a MS 720 Chain Saw

Get 2x Mills FREE!

Plus a bilum load of Accessories FREE worth K300

FOR ONLY
K5,862
INC TAX



*TO QUALIFY FOR THIS YEAR'S MILLING RACE, ONE MUST BUY A PROMO MACHINE AND PRODUCE INVOICE

ONLY FIVE (5) TEAMS
1ST COME 1ST SERVE.



Port Moresby
Call 325 5766

Lae
Call 472 2444
*Available 1st - 31st October, 2013

Kokopo
Call 982 9299



Nambawan Trophy sponsa long Kassman

Nicky Bernard i raitim

NAMBAWAN Trophy Haus i kamap gen wantaim wanpela sponsa. Dispela taim ol sponsa long Ivan Kassman bilong taekwondo.

Nambawan Trophy i givim ol samting bilong trening i go long Ivan Kassman long redi long ol pait bilong em long dispela yia na yia i kam.

Olgeta samting bilong trening i kos klostu long K4,000.

Long kisim dispela ol samting Kassman i tok tenkyu long Nambawan Trophy Haus long luksave long em spot we em bin mekim gut tru long sampela wol tai-tel.

Ivan i tok dispela spot em i stap insait long en em 12-

pela yia olgeta na em i kisim nem bilong kantri long sampela bikpela pait. Em i tok tu olsem em i save trening long haus tasol faivpela taim long wanpela wik, na ol samting bilong trening em yet save baim sapos em i gat inap mani o ol poroman I save givim em.

Em i tok sponsasip bilong Nambawan Trophy i kam long rait taim stret we em bai redi long sampela bikpela pait long dispela yia na tu long yia i kam. Em i tok ol dispela trening samting em ol planti taekwondo lain long ovasis I save trening long em.

Em i tok tu olsem ol I no go long sampela bikpela pait long ovasis bikos I no gat mani long salim ol go aninit long Sport Federa-

tion. Ivan i tok dispela ol bikpela pait olsem Wol Taekwondo long Meksiko em gutpela long putim ol I kam ples kliia long dispela spot tasol ol I no go.

Ivan bin winim sampela bikpela pait olsem long 2011 em winim Nesanel Sempionsip na kisim Gold, na long Osenia Olimpik Kolifai em kisim Brons. Long 2012 em i kisim foapela medol. Nesanel Sempionsip em kisim Gold, Sauten Sempionsip em I kisim Gold, Australia Open Sempionsip em I kisim Brons na Osenia Sempionsip em i kisim Brons. Long 2013 em i kisim Gold long 1st Korean Ambeseda Sempionsip na em kisim Brons long Sport Taekwondo NSW Open.



Ivan Kassman kisim ol trening samting long Nambawan Trophy Haus. Foto Nicky Bernard.

Nancy Kamara kap fainol kamap

Nicky Bernard i raitim

PRI Sisen softball resis bilong ol meri long Mosbi bai kamap long dispela wiken bihain long tripela raun pilai bilong ol.

Nancy Kamara Kap resis save kam long tupela wiken bipo long propa sisen save kam long long softball resis bilong ol meri, dispela pri sisen resis ol save makim long Nancy Kamara husat I bin wanpela bilong ol bikmeri i strongim tru softball resis bilong ol meri long Pot Mosbi

na kantri tu.

Dispela pri sisen resis i stap long tupela pul, long namba wan pul blak i lukim Bears i go pas wantaim 7 poin, ol I bin pilai tripela gem, ol I winim tupela na lus long wanpela. Gezelle ron bihain wantaim 7 poin, ol tu pilai tripela gem, winim tupela na lus long wanpela. Chebu I ron bihain long Gezelle wantaim 4 poin, United Sisters long 4 poin na Yokomo kam bihain olgeta.

Long pul Yelo Wantok i go pas wantaim 6 poin. Ol bin pilai tupela gem na winim tu-

pela wantaim. Bihain long ol em Wolves husat i gat 4 poin. Ol pilai tupela gem, winim wanpela na lus long wanpela. Stringer i ron bihain long 4 poin, ol pilai tupela gem, winim wanpela na lus long wanpela na Admiralty i ron bihain long pul bilong ol.

Long dispela wiken bai lukim ol tim husat i pilai tupela gem bai pilai wanpela gem tasol na bihain lukim ol poin long go insait long fainol. Bipo long fainol bai kik ov bai ol lonsim nupela Logo bilong meri softball bilong Mosbi.



Red Shield Golf de bai kamap gen

SALVATION Army kamapim Golf de bilong ol gen long dispela yia, Steamship kampani i givim bikpela sponsa bilong dispela pilai i kamap.

Dispela yia bai 30 yia bilong ol long kamapim dispela kopret pilai long mekim fanraising long helpim ol tarangu. Red Shield Apil i wok long helpim planti ol lain husat i wok long kisim hevi o ples bilong ol i bagarap.

Dispela golf pilai bai kamap long pinis bilong dispela mun na ol i lukluk long kisim 30 tim bilong pilai long dispela yia long bungim mani.

Neil Webb, teretorial komanda bilong Salvation Army i tok, olgeta mani ol i save kisim long dispela pilai save go long gutpela wok long helpim ol narapela lain i stap long hevi.

David Toua, jenerel menesa kopret afes bi-

long Steamship i tok, Steamship save helpim o sponsa long Red Shield long dispela pilai golf long sampela yia nau na dispela yia i apim han gen long sponsa.

Dispela yia pilai na mani ol kisim bai go long sampela bikpela wok bilong Salvation Army aninit long Red Shield Appeal.

POTO NA STORI :
Nicky Bernard.

- Weekend Softball Draws -

NANCY KAMARA 2013-2014 PRESEASON CHALLENGE CUP

**SATURDAY
12TH OCTOBER 2013**

DIAMOND TWO

TIME	TEAMS	TEAMS	POOL
8.00 - 9.15	BEARS	v CHEBU	POOL BLACK
9.15 - 10.30	ADMIRALTY	v STINGERZ	POOL YELLOW
10.30 - 11.45	GAZELLE	v UNITED SISTERS	POOL BLACK
11.45 - 12.15	LAUNCHING OF NEW POMWSA LOGO		
12.15 - 13.30	1ST IN POOL BLACK	v 2ND IN POOL YELLOW	

DIAMOND THREE

TIME	TEAMS	TEAMS	POOL
8.00 - 9.15	YOKOMO	v UNITED SISTERS	POOL BLACK
9.15 - 10.30	WANTOKS	v WOLVES	POOL YELLOW
10.30 - 11.45	CHEBU	v YOKOMO	POOL BLACK
11.45 - 12.15	LAUNCHING OF NEW POMWSA LOGO		
12.30 - 13.45	1ST IN POOL YELLOW	v 2ND IN POOL BLACK	
14.00 - 15.15	3RD & 4TH PLACE PLAY OFF		
15.15 - 16.30	1ST & 2ND PLACE PLAY OFF		
16.30 - 17.00	PRESENTATION		



Moa oil na meat insait

Kakaruk Singaut!!

LUKIM STORI BILONG
 SONNY BILL WILLIAMS
 INSAIT: Pes 26



OL i bin kambek taim ol stap long 10poin tasol na mekim strongpela pilai long winim Manly long Olympik Stadium. Dispela em namb wan win bilong ol bihain long 2002.

Ol i bin go aut olsem ol fevered bilong gren fainal, tasol Manly i kam aut strong na go pas long namba wan hap bilong gem.

Ol Rooster i kisim bek strong bilong ol na pilai gut long namba tu hap tasol ol Manly holim gem we i luk olsem bai ol i winim gem, tasol kik bilong Maloney i mekim na Michael Jennings i ran tasol i go na putim wanpela kain trai klostu long mak we i givim ol dispela gren fainal win.

Kosa bilong Rooster, Trent Robinson husat i winim wanpela taitel long NRL kosa, i tok, tim bilong em i gat trabol long namba wan hap tasol em i mirakel we ol i kisim dispela NRL gren fainal. Taim mipela i kam aut long dispela liklik hevi, mipela stap long fom na pilai gut i go gem pinis.

Nogat sikret fomula i stap, mipela i pilai strong tasol olsem tim, mipela wok olsem tim. I no bilong mi, em bilong mipela olgeta. Mipela olgeta i hat wok, olsem na mipela i win, kosa i tok.

Lukim ol Spot poto long Pes 25

Ol Rooster i ran antap tasol..Tripela trai long seken hap, Shaun Kenny Dowall (L) long strongpela pilai na trai bilong em i makim ol Rooster i winim namba 13 primiaship i kilim dai lam bilong ol Manly 26 - 18 las wik Sande.

Johnston's Pharmacies

Varta Batteries and Remington products

10% Discount

Specials

P.O Box 1066 Boroko
 Phone: 325 3185, Fax: 325 0190
 Email: sales@johnstons.com.pg